

A 30

W P


S = 5614.

~~H e g.~~

H - C - 34



1316



Ex Libris Com. Branicki
Suchal

Bibliothek
des
Zentral-Instituts
für
Oberschlesische Landesforschung

Zentral-Institut
für
Oberschlesische Landesforschung

Büchernr. 3438
Budziedzien Nr. A / Polon. f. 1.
Standplatz Nr. II / 198

Digitized by
Digitized by Google

Digitized by
Digitized by Google

P O L O N I A
D E F E N S A
C O N T R A

I O A N . B A R C L A I V M ,

Vbi , occasione ista , de Regno Genteque
Polona multa narrantur , hactenus
litteris non tradita.

Lukasz Opalinski (Estr. 23, s.364)



D A N T I S C I ;

Sumptibus GEORGII FÖRSTERI , S.R.M. Bibliopolæ.
ANNO M D C X L V I I I .

Cum Privilegio S. R. M. Polonie & Suecie.

Bibliothek
des
Zentral-Instituts
für
Oberschlesische Landesforschung

XVII-4052 III



P R A E F A T I O.

Ndignanti mihi sæpius, tam contumeliose descriptam, aut traductam potius gentem nostram à Ioanne Barclaio, in libro, cui nomen **I C O N A N I M O R V M**; Deinde vero accusanti incuriam non vindicantium hucusque patriam calumnia tanta atque impostura: Reposuere quidam, ut præstarem ipse, quæ ab aliis requirerem, subiremque eum laborem, quem honori & gloriæ gentis

A 2 no-

nostræ tam necessario putarem
impendendum. Detrectavi ali-
quoties operam , eo quod se-
rum nimis videretur , pridem
scripta nunc demum refellere ;
sed contra institere : librum
quemcunque novum semper
esse primum legentibus : ne-
que negligentiam imitandam
eorum , qui non responderunt
recens evulgato : Nec differri
debere amplius responsum :
cum & silentium non rejectæ
hucusque calumniæ potius in
argumentum agnitionis, quam
spretæ malignitatis trahatur ;
Et auctor , nobis tam iniquus ,
alli-

alliciat ad lectionem multos ,
lenocinio styli, non erudit i cer-
te aut virilis , sed tamen vana
specie atque copia , judicio
quorundam amoëni, aut potius
luxuriantis. Nempe, postquam
à verbis & imitatione antiquo-
rum penitus abstinentum sibi
esse duxit, adeo à veteri, id est,
vera & propria locutione ab-
iit, ut pigmentis omnibus con-
sumptis , fucum tantum obje-
cerit imperitis, & ignaris veræ
eloquentiæ censoribus. Subeo
igitur his de causis , non illam
hæresi infamem , sed innoxiam
hanc alteram *eikonomazjou* , osten-

A 3 dam-

damque facile , quæ de nobis
dixit , falsa & commentitia ut
plurimum esse , & aut imperite
ac temere , aut maligne ac con-
temptim scripta . Verba autem
ejus uno conspectu præmit-
tam , mox partitim omnia ex-
pendenda .

7

IOANNES BARCLAIUS
IN
ICONE ANIMORVM
Capite Octavo.

HUngariæ à septentrione Polonia est, inde ad Oceanum procedens Russiæque contermina. Tot spatiis diffusa regio pæne nullibi in montes assurgit : & à planicie factum nomen, quam Scythico verbo Pole appellant. Campi in immensum patent, quos nix altissima hyeme obruit : hac discussa segetes crescunt, non in indigenarum tantum usus, sed & mari delatæ, per multa Baltici littoris spacia, sterilibus fundis annisye opem ferrunt.

runt. sœvæ hyemes terram flumina-
que advinciunt, quia violentia Aqui-
lonis, nullis montibus repercussa, li-
berum ut in pelago cælum rapit: ac-
cedit septentrionis vicinia, & ibi
emoriens solis vis, præsertim cum re-
cessit ad brumam. Natura subsidium
admovit profundissimas sylvas, quæ
& in ignem datæ frigus expellant, &
in suis præterea umbris animalia
alant, quorum pelles fulciendis vesti-
bus preciosissimæ habentur. Hac du-
plici ope utuntur in hyemem. Alio
quoque commodo suis sylvis obno-
xii. Quippe alicubi immensa exami-
na apum fervent. Agrestia illa sunt,
nec cujusquam cura aut pastum aut
tecta accipiunt. Vacuis quercuum
ramis aut truncis inhærent; ibi ce-
reas

reas domos extruunt, & optimo melle implet. Hinc ingens facilisque in regionem proventus. Ceram Mercatores devehunt ; ipsi melle conficiunt potum, quem in deliciis habent. Flumina paludesque , plus justo quasdam provincias obruunt , adeo ut æstate vix possint adiri. concretis per hyemem undis curricula habent, quæ lubrica glacies facile evolvit : ita per regionem feruntur : & hoc est commercii tempus quo externi ad eos commeant ; ceramque & pelles mercantur , ac si quid præterea sub tam rigido cœlo in precium nascitur. Plerumque lapides extruendis domibus desunt. Lignis ad parietes utuntur, stramentoque operiunt , præterquam in celebris oppidis arcibusq; Opti-

B

matum,

matum , quantum illa regio ferre potest excultis. Polonis ut plurimum dura vita , cœlo aspero , nec populi moribus factis ad nostri seculi venustatem , & hinc aliquando sæviora ingenia. Diversoria peregrinos excipiunt, longe à nostrarum terrarum ratione. Deducuntur in sedem quæ inanis , & plerumque perfossis ad accipiendum lumen parietibus , ventis quoque & hyemi patet , nulli quibus decumbant leæti , non ereæta ad epulas mensa , longo ac multiplici clavo paries fixus est. illic hospites sarcinas quas habent in ordinem appendunt , multo deinde stramento sternitur solum ; & hoc in illis diversoriis pro toro est. Itaque per illam regionem processuri ad iter ita se comparant ,
quasi

quasi domum circumducant. Cibos & cætera in alimentum ferunt, lectulos in rhedis collocant, ut nudis illis tectis excepti, sua supellectile, & famem & frigora arceant. Gens est ad ferociam, & licentiam nata, quam vocant libertatem, adeo ut infandæ barbariei legem multis seculis ibi solemnem, vix nunc demum omiserint; Ea scilicet caverant; ut qui hominem peremisset, solveretur metu judiciorum, si in jacentis cadaver projecisset pauculos nummos, quorum numerus eadem lege destinabatur. Nec tam vile fecissent humanæ vitæ premium, nisi sui genii impetu pro levi facinore haberent, humanum cruentrem prodigere. Ipsum nomen non tantum servitutis, sed & justi ac le-

gitimi regni oderunt. Rex ad patrias
leges vi & armis adigitur. Nobilitas
tristibus prærogativis se ipsa donavit,
quibus possit sibi invicem & impune
nocere , quippe Principi non satis ju-
ris est, ut, quod peccaverint, ipse vin-
dicet. Maxime sibi credunt ; nec ma-
jor libido est libertatis in moribus,
vitaque incivili , quam in religionum
& cælestium rerum sensu; de quibus,
ut placet , sine metu , & sentire vo-
lunt , & loqui : scilicet immani fidu-
cia sui , quibus sapere alieno ductu
pudet. Hinc in diversa hodie scissæ
mentes , errorumque omnium lues ,
quicunque antiqua secula pollue-
runt. Quisque in suæ familiæ laudem
intentus est ; præsertim si in exteris
incidit , & expertes suarum fortuna-
rum.

rum. Sævire quam decipere promptiores, & ipsi magis fraudibus quam vi patent.

Hæc de nobis Barclaius. Et pauca quidem ad iconem animorum , multa vero nimis ad calumniam & opprobrium gentis nostræ. Singula ut pensitemus , ait in primis :

Hungariæ à septentrione Polonia est , inde ad Oceanum procedens Russiæque contermina.

Iejuna profecto est nimis atque imperita hæc descriptio Poloniæ , quo ad situm , amplitudinem , limitesque ejus. Quam tamen leviter notasse sufficiat. Ne enim rigidus exactor videar , veniam dandam arbitror auctori, cum toto hoc scripto Geographicam diligentiam non curasse videatur , animos potius populorum quam regionum situm describens. At sciat hoc tamen lector , quicquid à Baltico littore , &



Germaniæ limitibus, tum Carpato monte,
ac Tyra fluvio , inde vero campis Ponto
Euxino adfisis , ac demum ultra Boristhe-
nem amnem Moscoviæ termino , ingenti
prorsus terræ marisque ambitu includitur,
id inquam , totum Regni Poloniæ nomine
censer. Neque recensebo singillatim pro-
vincias quæ & quando in hoc corpus com-
munis jam populi coaluere, separatum vo-
lumen requirit hic labor , præstandus ali-
quando Patriæ, quando haec tenus pauca de
nobis, eaque multis erroribus referta Geo-
graphi prodidere.

Tot spatiis diffusa regio pæne nullibi
in montes affurgit.

Non est montosa Polonia nisi qua Hun-
gariæ aut Volochiæ adjacet; & paucis præ-
terea locis. Tatri autem Carpati Biescia-
dique montes longo certe tractu proten-
duntur , altitudine Alpibus , aut Pyrenæis
non impares.

Et

Et à planicie factum nomen , quod
Scythico verbo Pole appellant.

Derivatio & originatio hæc nominis nostri , quanquam multorum consensu recepta , merito tamen suspecta est . Quis enim dixerit populum ex tam levi causa nomen sumpsisse , sibique ultro indidisse ? Nam non ab externis impositum hoc ipso fatentur , dum illud à vernaculo nobis verbo deducunt . Vnde probabilior illa mihi videtur , quam Cromerus à Lecho derivat , & Polakos ait dici , quasi posteros Lechi . Cum omnibus fere nationibus commune sit , ab insigni aliquo & celebri duce nomen ducere : Aut quam opinio quorundam assignat , dum à Latinæ Ecclesiæ communione nos Lachos vocari à Russis , qui Græcæ adhæserunt , etiamnum constet , unde po Lacku significat , secundum latinum ritum . Et hinc appareret novitium hoc nomen genti , & una cum Christiana religione cæptum , cuius certe antiquiores scriptores nusquam meminere . Sed cur
Scythi-

*Plautus
pseud.*

*Lib. 3.
Cap. 43.
Germanie
antiquæ.*

Scythico verbo Pole nos vocari dicat Barclaius, cur non potius Slavonico? & unde didicerit, Scythicum istud esse verbum? Ego certe nescio. Profecto ariolatur, &, *jam inde à principio probus*, innuit, nos Scytharum gentem esse. Atqui ut hunc primum errorem ejus ostendam, non pigebit pauca adferre de gentis nostræ origine. Bastranas, Peucinos, Venedos eas terras incoluisse, ubi nunc Polonia utraque & Russiæ nigræ pars est, ex Strabone, Plinio, Tacito discimus. Et Philippus Cluverius, exactus sane Geographus, apertis argumentis deducit Bastranorum, Peucinorumque terminos fuisse istos, *Vistulam, Aprum amnem, Vulgo Wieprz, à fonte ejus linea ducta ad Tyram* (seu Dniestr) *tum Pontum Euxinum. Istrum* (id est Danubium) *ad Hierassi* (id est Druthi) *confluentem, & hinc Hierassum, tum Carpathum ad fontem Vistulae, usque ad Oppidum Osvuzecim.* Hæc Cluverius. Venedi porro fuerunt, ubi nunc major Polonia & Prussia est, ad Ostium Vistulae & mare protensi, unde Venedicus sinus. Satagit quidem idem

Salvo

idem Cluverius ostendere , Bastranas Germanos fuisse , sed frustra. Firmiter enim assero, quidquid à mari Adriatico, Græciæ Veteris , id est , Macedoniæ terminis, tum Ægei maris littore , Propontide , ponto Euxino, Caucaso monte, Caspio mari, inde ad Obium amnem linea ducta ; Tum vero mari & Albi fluvio , qui veteris Germaniæ terminus fuit , ac denique Danubii parte , gentium nationumque includitur , unius olim fuisse originis. Causas assertionis meæ habeo istas. Primo Livius Bastranas à Philippo Macedonum Rege accitos ad Italiam populandam dicit, facilemque illis ad mare Adriaticum accessum per Scordiscos, eam ob causam ponit , *quia nec aut lingua aut moribus abhorrerent*. Porro Scordiscorum ^{Lib. 40.} situs est , inter Danubium & Savum versus Illyricum protensus. Deinde eosdem Bastranas Thracibus permistos dicit Strabo libro septimo, & Pomponius Mela ab Illyrico cæptam Oram ad Istrum Pontumque *ab una gente, dicit, habitari, sed aliis aliisque prædicta & nominibus & moribus.* Et Sextus Rufus,

*In Brevia-
rio Rerum
Rom.*

qui vixit tempore Valentiniani, totum fere istum tractum adscribit Illyrico, cuius septemdecem provincias ponit. Et denique omnes istos populos Græciæ finibus & tum Istro ac Ponto adfitos, nempe Dacos, Mæfos, Thracas, Pannonas, Getas, tum vero Sarmatas velut unius nationis historici omnes & Geographi veteres recensent, & Scythici generis esse, falso quidem dicunt, ut infra patebit, sed tamen hoc ipso testantur gentis ejusdem fuisse. Tertio urbium nomina quæ à veteribus illo in tractu ponuntur idem ostendunt. In itinerario Antonini Augusti invenio Thraciæ urbem Orudysza, qua terminatione, puto non posse inveniri nomen, in alia lingua, præterquam Slavonica. Et S. cum Z. coniunctim efferre, aliis populis infuetum, frequentissimum Slavis, & præfertim Polonis. Iam apud Ptolomeum in Mæsia urbs Daufdava, in Dacia Zirdava, quali terminatio ne ab eodem prope Tyram ponuntur Cardidava & Petridava. Et ad Hierassum fluvi um (id est Pruthum) Zargidava Tam sida va.

dava. Et in tabula Peutingeriana ad Montes Bastranicos, id est Carpatum, Zagadava & Calidava. Cujus desinentiae & nunc in Poloniæ provinciis multa oppida inveniuntur. In Dalmatia etiam ejusdem Peutingerianæ tabulæ lego oppidum Bierzumno & aliud Pardua, quæ Slavonica esse apertum. Alia porro vocabula non mirum est Latina aut Græca videri, etenim pronuntiatione primum ab illis vitiata, postmodum scripto in terminaciones Latinas vel Græcas traducta: Aut novis etiam oppidis nova imposita, quæ per colonias à Romanis deductas, plurima fuisse condita certum est. Possem & quartum argumentum à moribus petere, illosque gentibus istis communes referre, ut equorum & arcus peculiarem & proprium illis usum. Sed immorari diutius tñdet. & satis me puto firmis argumentis omnium istorum populorum originem communem aut cognationem ostendisse. Id est, Illyriorum, Tracum, Bastranarum, Getarum, Sarmatarumque. De reliquis vero septentrionem versus genti-

C 2 bus,

bus, id est Russis, aut Rifacibus, nullum est dubium. Nunc vero ut eosdem populos à Scythis diversos ostendam, sufficere puto unicum, sed validissimum certe, & quod totam hanc causam continet atque conficit, idiomatis ac sermonis argumentum. Nulla enim re melius gentes aut ejusdem esse originis aut diversæ agnoscantur, quam lingua, quæ vere vinculum est nationum, & certissima generis ejusdem nota ac tessera: præsertim si antiqua sit, & nulla mixtione migrantium populorum corrupta. Talis autem est, quam nunc primigeniam maxima parte retinent gentes, eo quem posui ambitu contentæ. Præcipue autem Russia & Moscovia. Nam & nulli Historici eo novos populos narrant demigrasse. Et non est probabile, tam incultas, tamque desertas regiones ab adventitia aliqua gente, pulsis veteribus & primis colonis, occupatas. Quis enim credat aut putet loca vix quindecim gradibus à polo arctico diffita, nuper vero detecta navigationibus Hollandicis (quarum Diarium nauti-

nauticum Amstelrodami Anno M D XCVIII
editum , vidi ipse & legi) à longinqua &
peregrina aliqua natione petita fuisse ?
Certe nihil eam potuit allicere , & scimus
semper cultas ac uberes provincias ab in-
cursionibus egentium & inopum populo-
rum, impetas , non vero è contra. Vnde
certum est , gentes quæ ibi sunt , aborigi-
nes , ut ita dicam, esse , & à prima terræ il-
lius occupatione , continua successione
propagatas ; Porro , illæ lingua Slavonica
utuntur, quæ, antiquissima & congenita il-
lis, cum nihil habeat cum Scythis aut Tar-
taris, quanquam sibi conterminis, nec cum
Turcis , Persis , Arabibus commune (qui
omnes nunc sunt veri Scythæ, ejusdem fe-
re sermonis commercio conjuncti) nulla-
que prorsus vestigia verborum ejusdem no-
tionis ; Profecto sat aperte ostendit, diver-
fæ nos omnino gentis ab illis esse , cum
plane diversilingues simus ; Neque movere
quenquam debet veterum auctoritas , qui
Sarmatiam cum Scythis confundunt , &
passim omnes septentrionis populos Scy-

thas nominant. Notum est enim quanta imperitia Geographiæ antiquis harum præsertim regionum fuerit , scimus quam falsa quam diversa tradant, misceantque. Porro quemadmodum nuperis navigationibus occidentem versus detectæ terræ in universum Indiæ nomine vocantur , partitum vero quædam , ad arbitrium inventorum, insignitæ sunt : Ita Græcos à conterminis Afiaæ Scythis , omnes retro gentes septentrionem versus appellasse Scythas Strabo autor est lib. i. quasdam vero non proprio ipsis & peculiari nomine , sed prout libuit, aut ab aliqua nota indigetasse probabile est. Ita enim perpetua Geographiæ fraude fit , ut externi imponant nomina populis , neque vera aut ipsis propria , ac vernacula inquirant. A Græcis vero Romani *quoquomodo tradita pro compertis habuere.* Cum itaque apud veteres Geographos, nulla exacta inquisitio apparet , sed temeraria tantum & incuriosa assertio , nullis rationibus & argumentis fulta , ideo non curandum est, quid ipsi nugantur ,

Tacitus.

Et

— *Et quidquid Gracia mendax
Audet in Historia —*

Cujusnam ergo (inquieris) sumus originis ,
quæ gens , quæ natio ? Dicam quid sentio .
Omnem illum ambitum terræ quem supra
definivi , & gentes illas , quas unius linguæ
vinculo dixi contineri , universale & gene-
ricum quondam nomen habuisse puto , sed
incuria scriptorum ignotum nobis . Nam
quod Krantzus dicit , Vandalorum nomen
commune his populis fuisse , id certe mi-
nime comprobat , neque mihi persuadet ,
& apertissimis à Cromero nostro refellitur
argumentis . Certe dum ego omnia expen-
do , video omnem istam gentem quadrifaria-
riam dividendam . Nempe in Slavones , Ge-
tas , Sarmatas , ac Russos . Slavonicum no-
men illustre quamvis ac gloriosum (gloria
enim & fama nobis Slawa est) non tamen
vetustioribus scriptoribus ante cognitum ,
quam cum in Romanas provincias irru-
ptionibus cæperunt inclarescere . Certe
primi ejus meminere Iustinianeæ Historiæ
scriptores , Procopius nempe Cæsariensis ,
 &

& Iornandes Alanus. Nam constat testi-
monio & illorum , & Gregorii primi ad
Episcopos Illyrici scribentis , Slavos quin-
gentesimo quinquagesimo fere post Chri-
stum Anno, Illyricum, Thraciam, Mæsiam,
Dalmatiāmque invasisse , & ibi sedes po-
suisse gentis , quæ nunc Slavonica ibidem
est & cognomine & sermone. Quamvis
enim illorum populorum antiquitus com-
munem esse dixi originem , tamen ita in
mores linguamque Romanam, primum co-
loniarum deductione, postea vero commu-
nione civitatis, transiverant, ut vix ulla ve-
stigia priscæ gentis retinuerint. Itaque cul-
tura & opulentia, facile invitarunt, quam-
vis consanguineos olim populos , ad sui
vaftationem & occupationem. Huic no-
mini præcipue accensendi sunt , præter il-
los qui in Romanas migrarunt provincias,
avitis sedibus manentes Poloni. Tum vero
qui in Germaniam transgressi, Moravi, Bo-
hemi , Silesii , Pomerani, quos omnes Sla-
vones esse ; multi multis argumentis jam
comprobavere. Et vel antiquissima his po-
pulis

pulis cognomina testantur, Venceslai, Vladislai, Stanislai, Boleslai. Vrbium quoque appellationes, ut Vratislavia, Iaroslavia, Preslavia, Braslavia, aliaque complura ejusdem terminationis oppida. Getæ sequuntur, seu Thraces, quibus vetus Pannonia, Mæsia, Dacia, & totus Illyrici tractus adscribendus.

Quæque alia gentes ubi frigore constitit Ister

Dura meant celeri terga per amnis equo.

Has vero ut dixi nationes multum immutavit Romana in primis dominatio, tum vero irruptio Hunnorum Scythicæ gentis, & denique Turcici imperii variæ coloniæ. Getarum vicina gens Tertia, Sarmatæ, quorum veri limites fuerunt isti, (quanquam hæc confundant Geographi) ab Occidente Boristhenes, nunc Dniepr. A meridie Pontus Euxinus, Caucasus mons & mare Caspium, tum vero ab ortu Rha fluvius, qui nunc Volga. Idemque ad Septentriōnem deflectens fere totam Sarmatiā ambiebat, & à Russia secernebat. Quæ quarta & ultima est gentis portio. Cujus incolas

Ovid. de
Ponto.
Lib. 1.
Eleg. 3.

D vete-

veteres Geographi Riphaces & Riphæos & Roxolanos vocant ; Eaque continetur alba Russia , & Ducis Moscoviaæ ditiones , & Septentrionales illæ usque ad Novam Zemlam regiones. Hæc igitur gens est quadrifariam divisa , quam si vocaveris à principali nomine Slavonicam , non errabis . Illa autem nihil cum Scythis habet commune , quos ultra Europæ terminos , ad Asiaticos nempe populos relegamus , certis ac apertis limitibus ab illis divisi , lingua omnino dissimiles , moribus , & (quod maxime notandum) religione plane dispare & adversi . Machometanam enim Turcæ , Tartari , Saraceni , Parthi seu Persæ , Arabes aliquique cognati sibi populi avide ac unanimiter hauserunt , Slavones vero aut Russi , quamvis contermini Scythiae , detestantur : constantissime post abolitum paganismum Christianæ (quanquam non sine Schismate) adhærentes . Addo vero , nullam Linguam latius patere Slavonica , quod facile agnoscat , qui ab Adriatico mari ad novam Zemblam (quod nomen Slavonicum

cum plane est , & novam terram denotat) qui, inquam, tractum hunc maximum mensus fuerit. Plura nunc non addo , & hanc curam sepono, exacte magis & uberius aliquando impendendam. Subdit Barclaius.

Campi in immensum patent , quos
nix altissima hyeme obruit.

Omnia hic & multo magis infra ad conciliandum vituperium aucta invenies. Altissimam nivem Moscovia habet , nos saepe adeo illa non obruimur , ut adversus frigoris vim , tegi campos & sationes tutari exoptemus. Et profecto quoties nobis nivalis est hyems , Germania illam non minus experitur. Quinimo nihil frequentius apud Historicos veteres legas , quam nivem Gallicam, dici velut illis propriam, ita ut in proverbium venerit, & Petronius *παρεγματῶς* dicat *frigidior es nive Gallica*. Et Florus, *Gallos habere quiddam simile cum suis nivibus*, *Lib. II.*
cap. 4. dicit. *quippe primos impetus eorum acres , sed qui mox , cum pugna caluere , velut nives sole liquantur.*

D 2

Hac

Hac discussa segetes crescunt, non in
indigenarum tantum usus, sed &
mari delatæ, per multa Balthici
maris spatia, sterilibus fundis annisve
opem ferunt.

Decuitne vero almam & fecundam Ce-
rerem nostram, illam tot terrarum, tot po-
pulorum altricem, tam exili ac festina, im-
mo vero, tam infida mentione præterire,
& levi nimis prætervolare penna? Quam
pauca hæc, quam tenuia, quæ de illa me-
morat? Dicit per littora tantum Balthica,
idque sterilibus fundis & annis illam opit-
ulari. Atqui culta illa tot urbibus, tot op-
pidis Batavia, quæ Balthico certe non al-
luitur mari, nostro potissimum pane victi-
tat. Atqui velut olim Sicilia, ac postmo-
dum Ægyptus populo Romano annonam
alimentaque præbebat, ita nos horreum
non Bataviæ tantum, sed multarum sumus
nationum. Cum certum sit in Hispaniam
quoque & Italiam deferri messes nostras,

&

& frumentatione ista magnam Europæ partem ali ac sustentari. Et ut scias, qua copia & quanta ubertate; audi quæ hac in re comperta habeo. Constat mihi, hyeme decedente, cum nempe liquatis nivibus auctus Vistula faciliorem navigationem præstat, uno appulsi quinque millia navium Dantiscum secundo flumine aliquando venisse. Et, ut fatear, raro vernum de fluxum tam copiosum esse; sed cum aliquoties, prout amnis intumuit, navigatio repetatur, non quidem semper pari navium numero, sed tamen magno satis: puto me dicturum minus, quam res sit, si quatuor milia navium ponam, computando insimul rates seu trabes connexas, quibus etiam plurimum utimur. Porro navis oneraria, quales Vistula devehit, cum maxima est, capit medimnos Romanos veteres (hac enim utar mensura) bis mille ducentos, cum minima mille. Et, ut quam proxime omnes exæquemus, facile quælibet earum censeri poterit, mille quingentorum medimnorum; Quæ summa excrescit in sex

D 3 mil-

milliones medimnorum. Cum vero Medimnus fere (ut inter summum infimumque pretium ponam , & triticum cum siliagine alioque grano exæquem) veneat medio nummo Imperiali , quem talerum vocamus ; Proventus anni unius, uno ex portu, erunt tres millones talerorum. Iam vero sciendum est , Dantiscum non devehi frumenta nisi è vicinis & adfisis Vistulæ regionibus , aut ab accolis aliorum fluminum quæ eundem Vistulam intrant. Ita ut vix tertiae partis Poloniæ sit iste provenitus , cum in Silesiam quoque ac Pomerniam conterminam, antequam utraque provincia esset bello tam exhausta ac deserta , plurimum frugum inferretur : Neque ad rationes istas , nisi exigua pars Russiæ pertinet. Quæ miræ & insuetæ omnino fertilitatis , adeoque alendis & augendis seminibus idonea , ut non modo centesimum fructum (quod de Ægypto Plinius) reddat , sed quod admirandum plane est , una satione , binam messem (ex deciduis nempe spicis alteram) quandoque adferat.

Nec

Nec cultura placet longior annua.

Nec opus est, ut alter Poëta inquit, *Pinguifimo saturare solum.* Sed subactum utcunque arvum, injectamque sementem, præciso arboris ramo occant, & uberrimum inde referunt proventum. Cum autem tam ferax ac fecunda regio, affluentiam annonæ, nec ipsa depascere, nec alio deferre queat, sit, ut vilitas ejus plerumque sit maxima. Iam Litvania, quæ Magni Ducatus nomine audit, ferax & ipsa, frumenta partim Chronone, quem Niemen Vulgo vocant, partim Duna (qui Ptolomeo est Ruben) fluminibus devehit; idque ea copia, ut ex portu Pilaviensi, certa fide cognitum habeam, quindecem millia Lastorum, exteris negotiatoribus vendita. Last vero continet medimnos fere quinquaginta. Et ex portu Memelensi sementis lini viginti tria millia tinarum seu doliorum (nam id genus ibi est mensuræ, continens fere medimnos duos & semissim.) Hæc ergo paucis descripta ubertas, clare satis ostendit, quantum à vero abiverit auctor, dum illam tantum

Horat. lib.

3. Ode 24.

tum littori Balthico opem ferre dicit. Iam autem , quæ de hyemis atrocitate subjungit , expendamus.

Sævæ hyemes terram fluminaque ad-
vinciunt , quia violentia Aquilonis,
nullis montibus repercussa , libe-
rum ut in pelago cælum rapit : ac-
cedit septentrionis vicinia , & ibi
emoriens Solis vis , præsertim cum
recessit ad brumam.

Equidem clima nostrum cum Italiæ situ
non compono , & hyemem non nego mul-
to nobis acriorem esse. Sed ut apud nos sit
sævitia ejus maxima , id vero nego , & Ger-
maniæ pleræque non minorem dico , aliis-
que populis æque ad Septentrionem por-
rectis. Superat vero frigore Suecia & Mos-
covia multo magis borealis. Sed verba
Barclaii videamus. In primis dicit *terram*
fluminaque hyeme vinciri. Quid autem istud
miri aut magni est. nonne hoc plærisque
Euro-

Europæ populis commune? Certe præcipuos ejus celeberrimosque amnes, Rhenum & Danubium, *per hyemem sic gelascere* Lib. 6. dicit Herodianus ex versione Angeli Politiani, *ut camporum in morem perequitentur*. *Esse autem adeo solidam firmamque glaciem, ut non pedibus modo unguisque hominum & equorum subsistat; sed qui hausturi aquam sunt, non tam urnas & vasa secum adferant, quam secures & dolabras, ut excisam aquam, quasi lapidem sine ullo vase asportent*. Certe Plinius Panegiristes, eundem Danubium, dicit, *ripas gelu jungere, duratumque glacie ingentia tergo bella transportare*. Sed nempe acrior apud nos duas ob causas hyems, ob septentrionis viciniam, & camporum planitiem. Ista quam imperite dicantur, non mihi, sed omnibus credi volo Geographis, quorum consensu Poloniæ situs ponitur eodem cum parte Galliæ, & Belgio climate; ita ut Cracovia, Metropolis nostra, vix uno gradu latitudinis Lutetiam Parisiorum superet, ab Antverpia autem superetur; & Anglia, Hollandia, multo vero magis Scotia, ac Dania, ad gelidum

E acce-

accedunt axem nivalemque Arcton. Iam quo ad causam alteram Physiologia item non omnino constat. Nam & Belgum sub eadem cum Polonia plaga , ac parallelo, minime item montosum, neque à Borea (qui profecto è vicino mari violentior esse deberet) ullo obstaculo defensum esse. non tamen adeo ingentibus frigoribus algere scimus ; Et non per totam Poloniā ubique inveniri (ut Lucretius loquitur) *a quor campi plani* ; ego tibi affirmo. Cum minor Polonia , tota fere in montes assurgat , nec tamen dispari sit aëris temperie. Alia igitur causa aliquantum intensioris (fatendum enim est) apud nos frigoris deberet assignari. Ego certe , dum illa quæ de Rheno ac Danubio, testimonio veterum,dixi, dum quæ Tacitus de Germania prodidit : *Hymem nempe potissimam anni partem occupare , terram segetes tantum ferre , fructuum vero autumni que , & bona , & nomen , ab incolis ignorari , cum inquam hæc vetera , ei quæ nunc est omnium rerum , ac vini etiam , maximæ feraciati comparo ; huc judicio inclino , ut cultura*

tura & crebra inhabitatione , non soli tan-
tum , sed aëris etiam , putem naturam mu-
tari. Cur enim frigidior olim , quam nunc ,
Germania esset ? Certe nihil adferri proba-
biliter potest , nisi quod antea deserta ac
inculta , *nullas prorsus urbes* (ut idem Tacitus
inquit) *aut vicos connexis ac coharentibus adifi-
cias haberet.* neque agriculturam impense cu-
raret. Nunc autem frequentia ac populo-
sa oppida , tum crebra ædificia , & numerosi
pagi , ac denique pinguis ubique ingestofimo gleba , omnia ista , inquam , calidius
exhalant , aëremque tepefaciunt : Ita ut
non ob septentrionis viciniam , Solemque ,
ut Barclaius inquit , emorientem , neque
tam ob camporum planitiem , sed potius
ob frequentiam minorem oppidorum , fri-
gidior aura potuit antea Poloniæ imputa-
ri , quæ nunc ubique culta & habitata , mul-
tum demit antiquæ frigorum fævitiae . Ita
ut ejusdem quamvis climatis regiones , or-
tum versus porrectas , longe aëris tempe-
rie supereret : non alia sane , nisi majoris cul-
turæ causa , cum longitudo terræ ad im-

minuendam vim Solis nil possit conferre.

Natura subsidium admovit profundi-
ssimas sylvas , quæ & in ignem
datæ frigus expellant , & in suis
præterea umbris animalia alant ,
quorum pelles fulciendis vestibus
preciosissimæ habentur. Hac du-
plici ope utuntur in hyemem.

Vt omnium rerum ad necessitatem vitæ
humanæ affluentiam Polonia habet , ita &
sylvarum , quantum satis est. Adeo ut vi-
vere possit.

Ligna super foco Large reponens.
Attamen non tam obsita est arboribus ut
spelæa habeat , aut celebrem illam Herci-
niam sylvam , quam Cæsar novem dierum
itinere latam , longam quadraginta , Mela
vero etiam sexaginta dicit. Apud nos non
est quid simile , nisi forte in Lithuania ad
confinia Moscoviae & extrema Russia. In
Polonia vero ipsa , ubicunque ager est fru-
menti

menti ferax , & fationi aptus , excisæ sunt
sylvæ , & quidem sæpe nimis. Ita ut egre-
gius Poëta , & par omnino veteribus spiri-
tu , ac erudita amænitate carminis Kocha-
novius , Satyrum inducat querentem , se
pulsum propria sede , nimio incolarum lu-
cri & quæstus studio , dum pars sylvarum
cessit agriculturæ, pars in officinas ferrarias
aut vitrarias absumpta est. Iam vero pelli-
bus utimur , sed ab extrema Moscovia ma-
gno pretio petitis ; estque hic luxus inter
maximos , qui Poloniam urgent. cum Ze-
bellinis aut Martibus suffulta vestis , cuius
inter nobiles frequentissimus usus est, con-
stet aliquando prope duobus millibus
nummūm, quos vulgo taleros vocamus. Et
una pellis , quæ vix sesquipedali est magni-
tudine , si præstans sit , plus quinquaginta
taleris veneat. Sed adnoto quæ sequuntur.

Alio quoque commodo suis sylvis
obnoxii. Quippe alicubi immensa
apum examina fervent. Agrestia

E 3 illa

illa sunt, nec cujusquam cura aut pastum aut tectum accipiunt. Vancuis quercuum ramis aut truncis inhærent; ibi cereas domos extruunt, & optimo melle implent. Hinc ingens facilisque in regionem proventus. Ceram Mercatores devehunt; ipsi melle conficiunt potum, quem in deliciis habent.

*Lib. 3.
Cap. 16.*

Narratio ista de apibus erronea est, & multifariam falsa. Sciendum enim duplex genus apum in Polonia esse, sylvestre & domesticum. Vtrumque autem (qui primus Barclaii error) non est absque diligentia cura. non quidem tanta, quam requirit Varro, cum, *Verno tempore*, inquit, *& astivo*, fere ter in mense mellarius inspicere debet, fumigans leviter eas, *& à spurciis purgans alveum*, *& vermiculos ejiciens*. Præterea ut animadvertis, ne reguli plures existant, inutiles enim sunt propter seditiones; Multo vero minus ea, quam nimis

Lib. 9.

mis exacte præcipit Columella. Operosum hoc esset , nec fructus inde pensaret laborem , sufficit quod bina quotannis inspectione curantur, Autumno nempe, cum detrahitur illis mel , & (ut rustico verbo utar) castrantur alvearia , cum contra frigoris vim muniuntur, cum denique alveare ipsum mundum redditur. Vere autem redente , par cura redit , dum quomodo hyemem perpeſſæ, inspicitur, dum alveare iterum mundatur, dum novis examinibus parantur sedes, excisis ex professo alveis (non, ut Barclaius inquit , fortuito vacuis queruum ramis) nempe

Vt cum prima novi ducent examina reges

Vere suo, ludetque favis emissâ juventus.

habeant quo colonias deducant novas. Iam vero domesticæ majorem curam accipiunt , præfertim in Polonia ipsa. Nam in Russia , ubi præcipue res apiaria viget , aliquantum incuriosius habentur. Sepitur nempe locus medio in campo collocandis alvearibus, multa ponuntur vacua, ut nova recipient examina. Dum vero tempus legendi

gendi mellis venerit, quidquid est in alveo
excuditur, paucis propagationi ac feturæ
relictis. Ingentem vero proventum hinc
esse, verum est. Scio quendam amplas in
Russia ditiones possidentem, à subditis de-
cumæ annuæ accepisse mellis cados mille,
cadus autem venit sæpe decem aureis num-
mis. Sed ridiculum est, quod dicit Bar-
claius, pastum illis non præberi. Homo
acutus, hoc nisi addidisset, periculum erat,
ne cibaria diurna dari illis putarentur. Di-
gnus profecto ob hanc *ἀνείσταν*, qua natu-
ram nobilissimorum insectorum (aves vo-
cat Varro, Aristoteles autem magis splen-
dide πολιτικὴ ζῷα) scrutatus est, ut non cum
Domitiano captaret mactaretque, sed pa-
siceret potius muscas. Apparet certe vel
hinc, quam accurate ista inquisivit. Legis-
set saltem, quæ post Aristotelem Plinius
scripsit de celeberrimo hoc regno, an Re-
publ. potius dicam, nescio. Cum & sine
Rege esse non possint, illoque amissio, pereat
ac dissolvatur civilis societas; & quod Rerum-
publ. præcipuum fundamentum est, æqua-
litatis

accura-
tam dili-
gentiam.

Civilia
animalia

Plinii
Lib. 11.

litatis sint studiosissimæ. Nam (ut Plinius
inquit) *nusquam separati vescuntur, ne in a-* *Ibidem.*
qualitas operis & cibi fiat. Vnde puto mixtam
esse formam, & laudabili prorsus tempera-
mento, Principatum legibus devinctum,
populique ac magistratum auctoritate,
ne in tyrannidem abeat, libratum. Præser-
tim cum inermem aculeo constet supre-
mam hanc potestatem esse ; ut benevolen-
tia, nempe, potius civium (quod Principum
est) quam metu (quod Tyrannicum) sit
tuta ac secura. Sed non lubet bugoniam
(ut Varro loquitur) scribere, aut curam A-
ristomachi Solensis imitari, qui duodecim-
ginta annis nihil aliud dicitur egisse. Ita-
que remitto lectorem ad aparios, & vel
historiæ naturalis, vel rei rusticæ scripto-
res. De potu autem, quem hydromeli, vel
aquam mulsum vocamus, hoc addo, non
nobis solum, sed & Germaniæ, præsertim
in Pomerania & Dania usitatum esse. im-
mo & veteribus non ignotum : cum Plinius
dicat, *aquam mulsum, longa vetustate trans-* *Lib. II.*
ire in vinum. Quod testatum facit Lithva-

F nia

*Lib. 3.
Ode 14.*

nia conditam à temporibus Vitoudi Principis asservans , puto absque exacta Chronologiæ ratione , liquoris vetustate annotata, exemplo veterum, & Horatii, qui *Cadum Marsi memorem duelli , & testam Consulum nomine , sæpius insignit, uti & alter Poëta, dum inquit,*

Ovidius.

mihi fundat avitum

Consulibus priscis condita testa merum.

Neque tamen potus iste in deliciis habetur , quinimo fere illo cautiores abstinent ; cum suppeditet nobis vinum abunde Hungaria, quæ Poloniæ cella vinaria audit.

Flumina paludesque plus justo quasdam provincias obruunt , adeo ut æstate vix possint adiri.

Topographiam totius Poloniæ non ponam ; longum hoc est, neque mei instituti. Tantum vere & firmiter assero , nullum locum Poloniæ non pervium inveniri , ne dum provinciam , ut ille falso dicit , uti & istud.

Con-

Concretis per hyemem undis , curricula habent, quæ lubrica glacies facile evolvit , ita per regionem ferruntur.

Pari omnino aut fide, aut peritia. Itane vero, non alia nobis itinerandi ratio, quam hyeme ? & curriculisne tantum (puto illum trahas voluisse dicere) vehimur aut ferrimur ? Desunt nobis, scilicet, lecticæ cultæ omni ornatu , quì adhiberi solet : atqui audacter dicam , non est natio , quæ tam splendide, & tanto vehatur apparatu ; Plurima genera sunt curruum , forma varia , & aliis insueta regionibus, elegantiæ vero singularis. Quidquid præterea uspiam, in Italia, Gallia, Germania, pilentorum, lecticarum , qua ad commodum usum , qua ad splendorem ac luxum inventum est , Magnates passim ac promiscue utuntur. Sejungibus quidem concoloribus vehi adeo usitatum , immo obvium est, ut id non ponatur in aliquo lautæ elegantiæ censu. Et cum in exteris nationibus, vilibus plerum-

F 2 que

que effedis, quæ strigosi manni, præcisa aut rasa ut plurimum cauda , trahunt , patritiis etiam non indecorum sit uti, apud nos certe puderet , fortis alicujus aut fortunæ nobilem. Sed cum dixisset nos non posse itinerari, nisi hyeme (quod tam aperte falsum est, ut refutatione non indigeat) tum subjugit:

Hoc est commercii tempus , quo externi ad eos commeant.

Occluso nempe Poloniæ aditu , sublata viarum commoditate , quid mirum est commercia tolli ? Hoc certe consequatur necesse est. Sed ut primum commentitium prorsus esse dixi , ita & hoc non ego , sed quicunque tantilla Europæ notitia tinctus, facile falsi condemnabit. Quis enim ignorat, Dantiscano celeberrimo emporio, tum vero Elbinga, Regiomonto, Riga, Stetino, aliisque portibus, ingenti copia omne genus mercium ad nos deferri ? Certe Hollandia, mercimoniorum Europæ facile princeps,

ceps , præcipuam negotiationem apud nos exerceat , dum quicquid ex India advexit , Poloniæ potissimum vendit . Certe Anglia pannificium , maxime nostri causa , curat ; Certe aliæ regiones maritimæ , ita commercio nobiscum junctæ sunt , ut communicatione mutua , *quod genitum sit usquam , id apud nos natum esse videatur*. Iam vero terra quot advehuntur merces ? Italia non alibi überius sericum vendit , cuius promiscuus & perpetuus inter nobiles usus est. Ita ut , absque nobis esset , unica ejus , aut certe præcipua , in fovendis bombycibus œconomia , & artificium conficiendæ telæ ac vestis sericæ , penitus interiret. De Germania non dicam , quæ vicina & adsita nobis , permutat continuo suas opes. Hungaria quoque , ut jam dixi , nobis potissimum vindemiat , & generosum ac nobile merum propinat , ipsa vappam bibit. Iam Asiaticæ , id est Turcicæ ac Persicæ merces , quanto cumulo ab Armenis advehuntur , non est opus dicere ; Nota hæc facile cuivis esse possunt. Et Barclaius , vel à popularibus

*Plinius
Paneg.*

suis Scotis (nam fuit gente *Caledonius , Gallus natalibus*) scire optime potuit. Natio ista pertæsa miseræ & sterilis patriæ , *Per mare pauperiem fugiens* , apud nos quæstum facit. Antea vilissimi propolæ

*Invenal.
Sat. 3.*

*Lib. I. de
Off.*

*Cretensis
cum Ägi-
neta.*

— *quorum Cophinus fenumque supellex.*
 aciculas tantum , cultellos , fibulas , & alia id genus minuta divendebant , cistas & scrinia dorso bajulantes. Nunc vero (forte postquam falsam Barclaii de impeditis itineribus narrationem agnovere) curru mercimonia devehunt , & per oppidorum nundinas vagantur. *Mercatura autem* (inquit Cicero) *si tenuis est , sordida est.* Vnde illi eo censu habentur , quo Iudæi. Estque omnino nobis clitellarius Scotus , & Iudæus apella. *Kēns ὁ ἦρας οὐγωνίτης.* Hæc de externorum apud nos negotiatione ; Quæ cum fructuosa esse nequeat , nisi vicissim permittentur merces , idque sit proprie commercium facere ; ut penitus præcipuo isto societatis humanæ vinculo , ac commodo spoliaret Poloniā , & infociabilem plane redderet , non solum raro nos adiri , id est , nihil

nihil inferri mercium dixit , sed etiam vix
aliquid à nobis emi. Addit enim ,

Ceram & pelles mercantur, ac si quid
præterea sub tam rigido cælo in
precium nascitur.

Si de Scolymorrhodia , aut Lusinia , (ita
Scotiam forte Euphormio nominat) ista
dicerentur , verissima prorsus essent. Ibi
enim profecto , ut initio satyræ ipse dixit ,
nulla bruma segetes extinguit, nulli aestus adurunt;
Et si causam requiras , non alia potest assi-
gnari , nisi quia nulla proveniunt.

Nullaque in infasto nascitur herba solo.

*Quid enim tam nudum inveniri potest, quam illud
saxum ? quid, ad copias respicienti, jejunius ? quid
ad ipsum loci situm horridius ? quid ad cali natu-
ram intemperantius.* Tali patria oriundus cum
sit Barclaius, insultat Poloniæ, illi inquam,
Poloniæ , quæ maxima rerum omnium ad
usum vitæ copia & ubertate affluit: & quæ
vere est , ut cum Poëta compendio dicam,
Terra bonis contenta suis. Id autem ut ostendam ,

Senec. E-
pigram. se-
cundo de
Corsica.

Idem Con-
solat. ad
Helviam
cap. 6.

dam , velut per indicem , breviter tamen recensebo præcipua , quæ apud nos , non sub cælo tantum , ut nugatur , sed etiam solo nascuntur,in pretium. In primis autem , ut à Plutonis regno ordiar ; pretii omnis fons , ac origo secunda , argentum , quod Ilcuffienses fodinæ , Kielcenses , Checinenses affatim suppeditant. Sed primæ potissimum. Situm est Ilcuffium in Minori Polonia , & quatuor milliaribus Cracovia distum , fere autem integro milliari Polonico circa oppidum , fodinas habens , quas à trecentis jam fere annis excusat , fecunda & rara metalli , per tot secula suborientis opulentia : Cum saepe anno uno ad sex millia pondo argenti , quas marcas vocamus , extraxerit ; plumbi vero ultra quinquaginta millia centeniorum ; quod ex rationibus ejusdem oppidi compertum habeo. Magnam vero probabilitatem facit , in illo tractu consimilis terræ positio , natura , color , latius venas istas protendi ac patere. Immo & experimenta idem comprobant , tentata à quibusdam & explorata. Sed quia
impen-

impendio grandi res egeret (ut nempe subterraneus canalis , quem stolam vocant , aquam scaturientem , effuso , qua devexa est terra , alveo educat) ideo res hactenus dilata est , non sine spe tamen , conatus & eventus quandoque secuturi. Ex iisdem regionibus cadmia fossilis eruitur , ingenti prorsus copia. Metallum vero istud , commixtum æri , efficit Orichalcum. Æs vero ipsum Bozecinum prope non contemnenda ubertate effoditur. Ferri denique maxima copia , pluribus ex officinis prodit. Quæ omnia Dantiscum in exterarum gentium usus devehuntur. Sunt & montes carbonum fossarium , sed illorum usus nullus , cum abunde sit aliorum. Iam vero , antequam has telluris opes , è visceribus ejus petitas , claudam ingenti prorsus salis proventu , præfabor jure merito , cum non ineleganti Poëta quodam nostro , dicamque ,

*Pande tuos natura sinus , & divitis antri
Profer inexplicitum terris vectigal , & ingens
Depositum clara Lechia sub luce repone ,
Phæbe pater , si quando tua de fontibus undæ*

G Restin-

*Restinxisse sitim licuit : salis ima petentem,
Da calices hausisse novos , da largius urnam,
Plenaque Castaliis immergere labra fluentis.*

Rara omnino istius (quod aliorum opsoniorum opsonium est ac condimentum) apud nos Divum munere affluentia. Divum inquam : nam opinio est vulgo recepta , Sanctæ Cunegundis precibus impetratum nobis à Deo istud sal terræ, & illa indicante , detectam ejus venam. Porro *sal aut fit aut gignitur*, inquit Plinius. Vtrumque vero habet magna ubertate Polonia. Nam factitium & coctilem Russia affatim suppeditat, Samborum & Kolomiam prope, fossilem vero minor Polonia habet. Sed factitius , qui aut igni excocta aqua , aut mari adfuso in salinas , Solisque radiis humore siccato fit, frequens multis populis, & promiscuus est. Metallicus vero, & ,ut vulgo dicitur , mineralis , paucis locis invenitur. Meminit Plinius in citeriore Hispania E-gelaftæ , & in India Oromæni montis , ubi lapicidinarum (inquit) more ceditur renascens , majusque regum vectigal ex eo est , quam ex auro atque

*Lib. 21.
Cap. 7.*

Ibidem.

atque margaritis. Profecto Vieliciam aut Bochniam putes illum descripsisse. Vtique enim loco magnæ molis cylindri solidi salis, velut rupium fragmenta, exciduntur, tanta copia, ut non usibus tantum Poloniæ sufficient, sed & Silesiam Moraviamque sustentent. Et magnum sane provenit etiam nunc fisco Regio adferunt, sed immensum plane adferrent, nisi maxima pars in usum Nobilitatis absumeretur. Velut enim annonariis legibus, olim populo Romano, frumentum è publico datum, modico aliquo pretio, aut nullo; Ita apud nos equestris ordo gratuitum fere sal accipit, habetque hunc velut usum fructum patriæ communis, necessitatibus privatorum deservientis. Hæc autem vel sola copia ac ubertas salis, insulsum plane ostendit Barclaium, qui negat aliquid nobis in pretium nasci. Sali adjungo sal nitratum, quod Podolia abunde suppeditat; tum vero aliis è provinciis sulfur. Addo denique alia, quæ jam terra non abscondit, sed benigne profert, atque alit multiplici fertili-

G 2 tate.

tate. Inprimis autem omne genus frugum, ea quam paucis attigi affluentia. tum vero linum, cannabem, lanam, ceram, mel, omnia ingenti numero accumulo. Boum innumerā armenta, cum Iaroslaviæ sāpe triginata eorum millia, unis nundinis, vendita fuisse sciam. Equorum item sex septem millia. Porro multæ sunt panegyres, in quibus minori quidem numero, sed tamen grandi fatis, & aliis populis inaudito, venales sunt. Ita ut quotannis sexaginta millia boum è Polonia ad exterros mitti, tutissime possim affirmare, præter id, quod nos absumimus. Quid dicam de sylvestri proventu? Is vero ex rebus variis maximus est. Præcipue è cineribus distillatis, quod vulgo Potasz vocant, cuius ad pannificium, aut forsan tineturam panni, necessarius est usus, itaque magna copia in Angliam aliasque in oras divenditur. Tum vero pix, secamenta pro doliiis, afferes omnis generis; Ita ut quod Ammianus Marcellinus de Cypro dixit, tanta nempe tamque multiplici omnium rerum copia abundare, *ut navim onerariam,*

rariam , à fundamento carinæ ad supremos usque
carbasos , ædificare , omnibusque ornamentis instru-
ctam , mari committere possit , id ego multo po-
tiori jure de Polonia dicam , quæ non unam
navem , sed classes integras , nil opis exter-
næ indiga , facile instruere potest . Quod
adeo non agnoscit Barclaius , ut etiam di-
cat ,

Plerumque lapides extruendis domi-
bus deesse .

Omnino : Ita ut Scotti vicos oberrantes
non habeant , quo se adversus canum assul-
tus tueantur . Provide facturi , si è patria
peterent hunc thesaurum , quo potissimum
divites sunt . At homo nugator inaudivit
forsitan , non tam crebra nobis ædificia lapi-
de aut cocto latere strui , & hinc sagaciter
certe conjecturam fecit lapides deesse . Pro-
fecto si viveret , rogarem ut inquirere dili-
gentius istud vellet , adiretque ipse Polo-
niā indagatum , curarem certe ut cum
Plautino servo duceretur ad *latomias lapida-* ^{Captiveis.}
rias quæ pluribus in locis ad elegantiam

G 3 archi-

architecturæ suppeditant, non lapides tantum communes & promiscuos , sed marmor etiam multiplex,& alabastritem. Certe Sigismundus III Rex,Checinum prope, columnas marmoreas binas excidi jussit,alitudine pedum fere duodequadraginta. Sed dum extrahuntur, & machinæ ponderi non sufficiunt , una per medium fracta. alteram vero nuper magno molimine Vladislaus Rex statuit Varsaviæ , & memoriæ patris sui dedicavit. Quod vel unicum argumento esse potest , non solum ad usum , sed ne ad luxum quidem deesse nobis quidquam , & posse cultissimas quasque gentes omni elegantia æmulari & æquare. Habeimus ergo; sed quod jam addit,non utimur.

Lignis tantum (inquit) ad parietes utuntur , stramentoque operiunt, præterquam in celebris oppidis, arcibusque optimatum , quantum illa regio ferre potest , exultis.

Præfracte nimis negare non possum , su-
perari

perari nos ab aliis gentibus , & splendore ,
& multo magis frequentia structurarum.
Effusa nempe in alium luxum natio nostra,
& pertæsa longæ ædificandi moræ ac mo-
lestiæ , minus architectonicam hactenus
curavit. Sed ut alia omnis luxuria , ita hæc
quoque migrare ad nos videtur. Cum pau-
cis ab hinc annis , multa vere regio splen-
dore structa sint , quorum delineationes ,
brevi puto, vulgabuntur. Certe peritus qui-
dam artis ac celebris Architectus , Italus
natione, cum vidisset quasdam nuperas Po-
loniæ structuras, dixit eam, si pergeret ædi-
ficare , ut cœpit , intra unum seculum non
æquaturam tantum, sed superaturam etiam
hac in parte Italianam ipsam. Nobilium vero
domus lateritiæ cultæ satis , & ligneæ non
tam viles , ut eas describit Barclaius. Non
deest illis nitor & elegantia , neque stra-
mento teguntur , sed scandulis, quibus to-
tam Romam coniectam fuisse ad Pyrrhi
usque bellum , auctor est ex Cornelio Ne-
pote Plinius.

Sed hactenus de regionis natura. Nunc
pro-

promissam picturam animorum imperitus
Apelles orditur ; in qua pari omnino , aut
fide , aut diligentia, versatus est. Putes il-
lum, tamdiu, tantoque studio, fabulas scri-
pitantem, commentis assuevisse, ita narra-
re ex fide nihil potest. Prima autem linea-
menta, indolis & ingenii nostri, hæc ponit.

Polonis (inquit) ut plurimum dura vi-
ta, cælo aspero.

Cælum idem nobis cum cultissimis po-
pulis esse , jam dixi. Cujus tamen non ea
in animos hominum vis est, quæ in herbas,
fructus , olera. Quocunque loco mundi
vixeris, æque semper distas ab æthere, si te
illo oriundum meministi , si eo redditurum
cogitas, agnosces facile nil referre ,

— quocunque sub aëre nasci.

Duram vero vitam cur nobis imputet, nul-
lam causam video , præter imperitiam. Se-
quitur nempe suum genium homo semper
præcipitis judicii. Et quia ultimum apud
nos Septentrionem, terram sterilem, sylvis
obsi-

obfitam , paludibus fædam , seu ipse incu-
riose credidit , seu maligne ab aliis voluit
credi. ideo aptat tali patriæ , in dolem in-
colarum , conformemque suæ terræ facit.
Quid respondeam? certe non aliud , quam ,
provoco ad eorum testimonium , quibus
aliquo usu innotuimus. Et fidenter dico ,
non solum ad calumniam reprimendam ,
sed ad gloriam etiam consequendam , *nihil nobis accommodatius fore quam penitus inspici.* Pa-
teret facile , vitam nos vivere , omni deco-
ro , omni honestate cultam , & non Sybari-
tica quidem mollitie , omni tamen affluen-
tia commodam. Adeoque ab aliis nationi-
bus non superamur , ut sæpe in iis multa
requiramus. **Quod tamen non agnoscit ,**
quinimmo ,

*Plinius
Paneg.*

Nec populi (ait) moribus factis ad no-
stri seculi venustatem.

Quanto verius dixisset , vanitatem ! Nam
certe , quidquid apud vos venustum & de-
corum est , repetitis peregrinationibus ex-
cerpsimus , & velut apes collegimus. **Vti-**

H nam

nam vero non etiam mellis loco & venena,
morbosque varios animorum. Nam quo-
tusquisque cum Vlysse prætervehi gnarus
(ut ait Epigrammatum scriptor.)

Syrenas hilarem navigantium pñnam?

Martialis. Certe ut culturæ & elegantiæ nonnihil, ita
& vitiorum à vobis sumpsisse verum est.
Non tamen degenerasse omnino in ve-
stros, id est Gallicos mores. Gallia etenim,
pulcherrima (fatendum est) regionum;
nunc sola fere præbere videtur cultum
morem, omnibus (præter Hispanos) co-
matis braccatisque Europæ gentibus. Et
quidquid illa invenit, aut innovat, id pul-
chrum decorumque æstimatur. Excitata
nempe gentis indoles, prompto ad omnia
ingenio, & laudem meruit elegantiæ &
imitationem. Sed ipsa hoc applausu super-
ba, rigide nimis ab omnibus exigit, suos
mores, damnatque contrarios. Cum tamen
mea sententia,

Horatius
Serm. 1.
Sat. 3. *Stultus & improbus hic amor (sui) est dignusq; notari.*

Non enim ita ibi vivitur, ut id regulæ in-
star omnibus esse debeat. Multa in pro-
miscuo

misco usu sunt , quæ prisci & melioris
ævi censuram non effugerent. Multa va-
na , ludicra , dissoluta. Innatum hoc
nempe ingeniiis humanis , ut nimia cultu-
ra ineptiant. Et causa in aperto. Nam
permittunt sibi omnia. Ideo securi de ju-
dicio aliorum , qui suo multum sibi pla-
cent. Ita olim Græculi , dum omnes bar-
baros vocant,& sua nimis amant æstimant-
que , scimus quantum in omni vita delira-
verint. Ita Romani , eorum exemplo , mori-
busque corrupti , quantum à prisca illa vir-
tute , gravitate , & constantia , abiverint ;
vel Senecæ verbis patet ; **Qui Torpent** (*in-*
quit) *ingenia desidiosæ juventutis. nec in ullius rei*
honestæ labore vigilatur. Cantandi saltandique ob-
scœna studia effeminatos tenent : Et capillum fran-
gere , Et mollitie corporis certare cum faminis , Et
immundissimis se excolare mundiciis , nostrorum ado-
lescentum specimen est. Putes illum plane ratio-
nem vitae eorum , qui nunc in Europa tam
culti tamque elegantes audiunt , notasse.
Quod ut ostendam , operæ pretium erit af-
ferere , gravis viri , Philippi Cominæi , de

*Primo
Controv.*

*Lib. 1. ex
versione
Steidani.*

Gallicis moribus indicium. Qui, dum ingenium Ludovici undecimi describit, *Mea quidem hæc est sententia, (inquit) ut arbitrer, plurimum illi profuisse, quod deserto patre, vixit annis sex, apud Philippum Burgundia Ducem: Nam si fuisset educatus, ita ut hodie mos est, in Gallia, puto illum ex tot difficultatibus, non fuisse emersurum. Sic enim hodie plerumque instituuntur, quasi ad ludum facti essent, aut jocum; litterarum nullam cognitionem habent, in vestitu nihil modestum aut grave, in sermone nihil prudens; negotiorum, tam ad vitam privatam, quam publicam, ignari. Si quis est, qui, tanquam è veterno expergefactus, rebus gerendis animum adjiciat, hoc sero admodum fit, & amissis propemodum occasionibus. Hæc Gallus de Gallia. Quæ tantum abest, in melius mutata esse, ut putem, corruptos mores, jam à temporibus Cominæi, increvisse, & incuriam hanc, negligentiamque vitæ, plurimum auctam. Ridiculum est, & verum, quod narrabo. Dum Parisiis essem, quæsivi ab hospite de Academiæ loco (Sorbonam ibi vocant) atque petii, me ut in illam duceret. Respondit ille, plures esse in*

in urbe ; & num omnes , num aliquam è præcipuis , adire esset animus , percontatus est . Ego ratus rudem hominem , & idiotam , Collegia singula , sub nomine Academiæ sumere , rogavi , ut præcipua saltem eo die inviserem , reliqua postmodum adituras ; Sequor itaque præeuntem . Intramus vero amplam domum . Multi juvenes inerant , quorum pars gladiatoriam exercebat , pars saltabat ad numeros , alii pulsabant testudinem , alii ligneo equo insiliebant , alii denique varie torquebant , jaciebantque hastas . Cum petii , quænam domus hæc esset , respondit , hanc Academiam esse , & hic nobilitatem Gallicam institui . Istisne tantum artibus , inquam : non , inquit ; & toto matutino tempore equitare etiam solent . Aversus ab illo , risi effusissime . Et , ô Musæ , inquam , itane gladiatoriis ludus , aut palæstricon , occupat sacratum vobis Academiæ nomen ? En profecto novos Academicos , novos Arcefilas , Carneadas , Pirrones , qui non jam nihil sciri posse docerent , sed nihil dici oportere , exemplo

H 3 suo ,

suo , & tota vita comprobarent. Etsi enim
 corpus exercere , & ad arma , ac militaria
 opera assuefacere, juventuti præsertim pul-
 chrum & laudabile : Tamen *cum nostra om-*
Sallustius
bello Catil. *nis vis, in animo, & corpore, sita sit; animique im-*
perio, & corporis servitio, magis utamur : plus
 certe curæ tribuendum erit illi , qui *dux at-*
que imperator vita mortalium est. ne incultu &
 bonarum artium inscitia obsolefecat. Id ve-
 ro , Gallica Nobilitas non agnoscit , cuius
 educatio omnis , & cultura , ad corpus re-
 fertur. Ita autem educati , quomodo do-
 ctrinæ quidpiam , & prudentiæ , multo ve-
 ro minus sapientiæ habeant? Nihil legunt,
 præter amantium fabulas, id est (ut Lipsius
In Notis
Polit. ad
cap. 10.
lib. 1. alibi dixit) *nugatorum ingeniosos fatus, libros pe-*
stilentes, natos blande inficere, aut interficere juven-
tutem. In quo numero ex veteribus Helio-
 dorus est, nuper vero Amadæus, Vrfeus, &
 qui nobis convitium facit , & qui

Horat. lib.
3. Ode 7.

— peccare docentes

Fallax historias monet ,

Ioannes Barclaius. Hos secuta infinita pro-
 pe farrago, narrantium, procaces virginum
 mores ,

mores, clam parentibus habita cum procis colloquia , furtivas literas , conventiones nocturnas , amplexus , oscula , ac denique fugas etiam , & absque ulla violentia raptus : omnia vero ista , si Diis placet, salva pudicitia atque honestate. Hæc uterque sexus legit , miratur, & imitatur.

*Attendit Thymele, Thymele tunc rustica discit
— & fingitur artibus*

*Iuvenal.
sat. 6.*

Iam nunc , & incertos amores ,

*Horat. lib.
3. Ode 6.*

De tenero meditatur ungui.

Indecorum vero esset juveni , non habere virginem, quam proceret, quo beatus sit vulnera, qua pereat sagitta : Non spe aut animo connubii , sed ut amore langueat , aut potius se languere simulet, crebro suspiret, continuo adhæreat ; confabuletur , officiose salutet, deducat, & omnino otiose insaniat. Hoc agunt omnes, inter speculum , & pectinem, & calamistrum occupati. Si quid diei supereft , datur audiendæ histrioniæ , vel pilæ ludo. Ita tempus vitæ absumunt, homines, digni profecto, quos Æacus, post mortem , jubeat cum Claudio , *alea ludere , Clandium.*

*Seneca
Ludo in
Clandium.
pertiu-*

pertuso fritillo. Et nisi quandoque bello occuparentur , certe luxuria , lascivia , otio periret ,

In cute curanda nimis operata juventus.

Iam vero quæ Cominæus memorat de vestitu , hic continuo & in dies mutatur . Nec ille solum , sed capillitum , barba , & hoc forte male habet , quod non tota faciei forma . Quamvis absque hoc satis immutantur , & quem hodie senem vidisti , cras rasa ; barba , tum capillitio adscito , juvenem videbis . ita ut sæpe riderem , quæ Medea istos , tam cito recoxisset . Ultra non lubet has amænitates & venustates persequi : quibus carere Poloniam adeo non inficior , ut gratuler etiam patriæ . Non habemus profecto istas delicias , non habemus *Mancipia* *Seneca
Epist. 15.* in magisterium recepta , quos nova artifacia docuit famæ , qui gressus nostrros temperent , qui saltare , canere , ludere , & ejusmodi nugas docti , alios doceant : De gravibus & seriis Romanis dicit Cornelius Nepos , *Scimus musicen nostris moribus abesse à persona virorum principum , saltare etiam in vitio poni.* Hoc quadrat nostræ

nostræ nobilitati , quæ curis Reipubl. intenta , his artibus non indiget ; Illis qui à publicis negotiis arcentur , convenit talibus occupari. *Expedit tibi ô Cæsar* (dicebat Histrio ad Augustum) *populum circa nos distin-*
neri. Nam *virtus* , culta ac civilia ingenia *subditorum* , tum mentes , ad seria negotia natæ , ut ille ait , *ingrata imperantibus* ; *quibus boni* , *quam mali suspectiores sunt* ; *semperque his* (ut vere inquit Sallustius) *aliena virtus for-*
midolosa est ; & causam puto recte assignat Panegyristes , quia nempe *patientiores servitutis arbitrantur* , *quos non decet esse nisi servos.*

Sed ne videar externos mores reprehendere , proprios vero consulto præterire , paucis rationem vitæ nostræ aperiam. Istud autem in primis : Nobilitatem Polonam non esse urbicolam , & mercatoribus ac opificibus relinquere hanc mansionem. Villas & paterna rura quisque incolit , magno ut infra dicam probitatis integritatisque præfido. Porro , quamvis ruri habitantibus , non per inertiam vita perit , actioque omnis nostra , partim in Reipub. procuratione ,

I par-

*Apud
Dionem
lib. 54.*

*Tac. in vi-
ta Agric.*

*Sallust.
Ingurt.*

partim in domesticis negotiis occupatur. Prima , honesta , imo splendida est. altera vero , seria, innocens, ac jucunda. Publica quod attinet : Inprimis comitia obimus, non solum cum suffragii jure , sed etiam cum intercedendi potestate. Magnus vero iste magnarum mentium , gloriæ comparaudæ , caritatis erga Patriam testandæ , ac boni publici promovendi,campus est. Hic enim leges conservamus ; hic omnia censemus , vetamus , intercedimus ; hic egregia moderatione , inter venerationem Principis, libertatisque patrocinium, bono patriæ consulimus. Huc potissimum institutio omnis nostra aptatur & dirigitur. eo fine juventus nobilissima literas discit , ut eas aliquando, magna ingenii, judicii,& eloquentiæ fama,in usum Reipubl. promat. Promit autem rara , nec vulgari aliis gentibus, laude. Dum qua equestris , qua senatorii ordinis viri disertissimi , gravissimas sententias , dignas posteritatis memoria , dignas notitia exterorum, promunt ac proferunt; & priscæ illius constantiæ, quam olim Roma in

ma in suis civibus (sed brevi tempore, neque sub principatu) venerata, magna edunt specimina. Quam dispar autem aliarum nationum πολίτευμα? ubi in civili administratione, nihil come, nihil simplex, nihil honestum, nihil illustre, nil forte, nil liberum. Vbi nobilitas δπολιτικώτατη, nihil consulitur, timet multa, assentitur omnia. Vbi nulla comitiorum potestas, nulla ordinum autoritas, sed umbra & vacua species consultationis, & muta ac sedentaria tantum, assentiendi necessitas, dum unus solusque censet quod omnes sequantur, & omnes improbent, dum imago vera miseri illius senatus, quem tum vidit Roma, cum amississet Cice. ad non modo succum ac sanguinem, sed etiam colorem, Epist. 15. ac speciem pristinæ civitatis. Et quem ita descripsit poëta.

— Non consule sacræ
Fulserunt sedes, non proxima lege potestas
Prætor adest, vacuæque loco cessere curules.
Omnia Cæsar erat.

Vbi nec sentire quæ velis, nec quæ sentias dicere licuit. & cum voce memoria quoque ipsa periisset, si tam in potestate eorum fuisset obliuisci,

tractatio
Reipubl.
Cice. ad
At. lib. 1.
Epist. 12.
expers
maxime
negotio-
rum civi-
lium.
Idem Epist.
ad octav.
Plinius
Paneg.

Cice. ad
At. lib. 4.
Epist. 15.

Lucanus
lib. 1.

Tacitus
Hist. 1.

Idem in vi-
ta Agric.

quam tacere. Sed ne insultare videar alienæ miseriæ , redeo ad narrationem quam incepí.

Et hic quidem primus, uti dixi, campus est Reipubl. capessendæ. Alter vero non minus celebris , judicia nempe , ut vocantur , Tribunalitia, absque ulla provocatio-
ne. Vbi etiam supremæ civilis potestatis participes efficimur , accepto arbitrio in bona & honorem concivium,imo in vitam etiam ipsam. Cum etenim Principes curis imperii distinerentur , & jus dicere ac reddere in tam amplo regno non possent, precibus & necessitati civium concessere , ut delegatos judices sibi crearent , certasque actiones eorum permitterent arbitratui. Legunt itaque, certa & stata die, binos aut singulos, ex quovis districtu : qui, ubi convenere , annuam potestatem retinent , sed amplam, ut dixi, & Regium quidpiam præferentem. Eximia etenim eorum majeftas ac veneratio , multis legibus asserta , constanti usu & consensu nobilitatis retenta ac defensa. quæ velut unicum tutamen ac
præfi-

præsidium libertatis habet judicia ista. Et quidni habeat? Certe seu ad justitiam exercendam , seu ad vitandam oppressionem unius , seu ad æqualitatem retinendam facit : judicia deferre iis , qui abuti potestate tanta non possint. Brevis enim & annua est ; & lege cavetur , ne prorogari aut continuari electione queat. Tertia occasio Reipubl. tractandæ est , quam exigit cuiusque munus & officium. Sunt enim Magistri finium regundorum , qui Principes equestris ordinis audiunt. Sunt provinciales Iudices : sunt denique publicæ securitatis custodes , capitanei , ut vocantur ; inter istos partita est forensis omnis opera. Deinde extraordinariæ quædam publicæ functiones interveniunt , auctoritate Comitorum injunctæ ; sed injunctæ volentibus: nam cogere , & invito munus quodcunque imponere , nemini fas est. Hæc sunt fere publica pacis negotia quibus occupamur. Bello autem aliquo imminente , promptam multi subeunt militiam. Neque tantum nomina sponte dant , sed pro opibus , equitum

peditumque pluribus centuriis & cohortibus , proprio ære scriptis , necessitati publicæ subveniunt. Res est mira , & nescio an ullis gentibus olim & nunc sueta. Certe ut expeditiones veteres non memorem , nuper cum Koniecpoliū contra Tattaros moveret , præter ordinarium Reipubl. militem , qui ad subita casuum continuo alitur , octodecem millia lecti militis , ultiꝝ à privatis submissi , in castris habuit , qui eorum sumptu militarunt : Ut vel hinc apparet , ibi communem salutem omnibus esse curæ , ubi Regnum , non possessio , non hæreditas , non peculium unius , sed societas legibus devincta , sed patria communis est . Quam , aliter , ubi despotæ illi & domini regnant : ubi nisi emptus , nisi coactus miles militat , ubi nulla subsidia , nisi extorta ab invitis , & perdere se reputantibus quicquid conferunt in publicum .

Iam vero , ut ad alteram partem veniam vitæ nostræ , tum illorum qui à publicis curis per intervalla vacationem aliquam habent , tum qui procul negotiis ut prisca gens morta-

mortalium, sibi vivunt; utrorumque, in-
quam, non est animus, secordia atque desidia bo- *Sallust.*
num otium conterere. Seria uti dixi, innocens,
& amoena est occupatio. Aut enim œco-
nomicis laboribus tempus transfigitur, dum
quisque suum patrimonium diligenti indu-
stria excolit, utilius semper reddit, & pro
copia exornat; dum non erubescit, alia ru-
ris negotia, quæ infima etiam obiisse ma-
gnos viros scimus, *gaudente sapientia terra* (ut
Plinius inquit) *vomere laureato & triumphali* *Lib. 18.*
agricola. Aut venationi indulgetur, quæ li-
beralis plane & jucunda in usu continuo
nobis est. Aut lectioni etiam aliquantum
datur, aut amicorum officiis, & mutuæ hos-
pitalitati, aut denique solutæ curis edaci-
bus vitæ. Dicunt nempe, & sentiunt tales
cum Kochanovio nostro.

Patria rura colo: nunc fallax aula valebis; *Offic.* *Lib. 3.*
Nil promissa equidem magna tua illa moror. *Eleg. 15.*

Libertas, gemmarum instar mihi, & instar arena est,

Lydius aurifera quam vechit amnis aqua.

Hic ego nec nutum alterius, nec limina servo,

Infringens duris molle latus foribus.

Nec

*Nec votis excepto famem incenatus herilem,
Nec cuiquam in turba pugno aperire viam.
Nullius ad leges vitam compono, licetque
Tempora mi arbitrio ponere cuncta meo.
Et alia quæ ibi celebris poëta eleganter in
laudem vitae rusticæ subjungit. Porro, ut
verissime dixit Tragicus,*

*Seneca
Hypolito.*

*Non alia est magis libera, & vitio carens,
Ritusque melius vita quæ priscos colat ;
Quam quæ relictis mœnibus campos amat.*

Verissime inquam, & vel experimento Poloniæ id dicere possis : cuius ego constans probitatis pietatisque studium, mores ut plurimum, priscæ illius integritatis & modestiæ, totam denique vitae rationem seriis occupationibus deditam, non alteri causæ adscripserim, quam, quod non miscemur vitiis, quæ continua illa & otiosa cohabitatio, vicissim tradit & accipit. Hinc profecto est, quod caremus depravatione illa & corruptela morum, qua plerumque scatent animi gentium externarum. Hinc quod pacem & quietem publicam patimur, nec conspirationes, factiones, turbas, bella

bella denique civilia excitamus : dum enim quisque domi suæ Rex est ; dum habet , quo otium honeste ac jucunde transfigat ; dum mentem rerum præsentium cura occupat ; non ille vasta animo concipit , aut meditatur ,

— non ille Regno servit ,

Ibidem.

Aut Regno imminet , spēi metusque tutus.

Hæc est , contra Barclaii calumniam , morum & consuetudinem Poloniæ defensio . Quibus non venustas , ut ille dixit , sed vanitas deest : Seria enim amamus , & illis adhæremus . Vobis , quibus (ut Senecæ verbis dicam) *omne ludicrum in pretio , quibus etiam post juventam canosque puerilitas remanet , & qui senes pila luditis :* Vobis , inquam , hæc omnia venusta relinquimus , & frui talibus patimur , sine æmulatione aut invidia nostra .

Et hinc (inquit) sæviora ingenia .

Plane , sumus truces , feri , immanes , & denique Scotis similes , quorum sævissimas mentes , *supras fas humanitatis , odii ac inimicitarum tenaces .* eodem libro describit Bar-

K claius.

claius. *Cadem cæde (inquit) repensare decorum,*
incendia alternis ignibus vindicare, nec aperto tan-
tum marte, sed insidiis & fraudibus agere: & deni-
que nihil turpe aut ignobile, modo ulciscantur ini-
mici, reputare. Ecce Thracum mores, aut po-
tius Scytharum (nam sunt ex Geographis,
qui Scotos ab illis dicant oriundos.) Ecce
Scoti, confessione popularis sui homicidæ,
incendiarii, & qui fraudibus graffantur. De
nobis puto illum nihil ejusmodi scivisse, &
ista scribere tantum, ut tinniat verbis, vere
æs Dodonæum. Sævitia igitur omnis ab-
est. *At ingenii Benigna vena est: Ingenii,* in-
quam, ad omnia facilis, erecti, & excitati.
Musas certe passim ab exterarum gentium
nobilitate spretas, & ad plebeium ordi-
nem, ut plurimum, redactas, nos soli velut
proprias putamus splendori natalium; &
claritudinem generis, nulla alia ratione
magis illustrari censemus, quam doctrina.
Vnde prima institutio nobilissimorum A-
dolescentum, literarius ludus & Schola
est. Hac ad juventæ maturitatem detinen-
tur, illamque egressi, peregrinationes ob-
eunt

Herat. lib.
2. Ode 18.

eunt eadem cupiditate doctrinæ. Agno-
scit hoc sæpe Lipsius, & Schonæo scribens
fatetur, *hac parte beatam patriam nostram esse.* Centur. 4.
Miscel.
apud nos (inquit) in omnia alia studia Nobiles Epist. 7.
versi. Eademque Epistola, *humanitate, ele-
gantia, omni cultu animi nos provocare, dicit, latif-
simas quasque gentes.* Sed quid ego dico pro-
vocare? immo, ut ipse fatetur, superare.
Nam Epistola alia, ad Marcum Velserum
Germanum, (ne putas illum genti abblan-
diri, quod certe ingenio tanti viri alienum)
Mirum mirum (inquit) Sarmatiam sic excultam Centur. 5.
Miscel.
hodie, vel supra Hesperiam utramque (gnarus dico) Epist. 51.
*esse. Nostri homines aliter, & veteres Cimbri (Be-
cani hac assertio) ad Cimmerias ignorantia tene-
bras eunt.* Huic testimonio tanti viri ad-
do Erasmi Roterodami judicium, dicentis,
nos, & literis, & legibus, & moribus, & religio-
ne, & si quid est quod à Barbariei probro vindi-
cet, cum præcipuis & lautissimis nationibus certare
posse.

Diversoria peregrinos excipiunt, lon-
ge à nostrarum terrarum ratione.

Deducuntur in sedem quæ inanis est , & plerumque perfoſſis ad accipiendum lumen parietibus , ventis quoque & hyemi patet. Nulli quibus decumbant lecti , non ereta ad epulas mensa , longo ac multiplici clavo paries fixus est , illic hospites sarcinas , quas habent , in ordinem appendunt: multo deinde stramento sternitur ſolum , & hoc in illis diversoriis pro toro eſt. Itaque per illam regionem processuri , ad iter ſe comparant , quaſi domum circumducant , cibos & cætera in alimentum ferunt , lectulos in reidis collocant ; ut nudis illis tectis excepti ſua ſupellec̄tile , & famem & frigora arceant.

Hæc quamvis multum verbis auxit , &
more

more suo (est enim, uti dixi, semper λαλίσα- loquacissi-
τῷ) exaggeravit, non omnia tamen falsa mus.
dixit. Non sunt nobis hospitia quæ men-
sam apponant peregrinantibus, & quæ le-
ctos præbeant. Sed qui perspectam habue-
rit rationem morum & consuetudinum Po-
loniæ, adeo istud non mirabitur, aut dam-
nabit, ut approbet etiam, & adfateatur ali-
ter fieri non posse. Nam tenuioris fortunæ
homines, lautis hospitiis non indigent. ex-
teri vero, præter mercatores, raro nos ad-
eunt. Nobilitas autem tam frequentem &
numerousam familiam, tam splendidum fa-
mulitium alit, ut fidem res apud externos,
& rerum nostrarum ignaros, non inveniat.
Certe privati homines Regum aulas sæpe
æmulantur, & stipati incedunt caterva in-
genti, quam nullus tam laetus caupo est,
qui commode excipere possit. Commeatus
in antecessum parandi sunt, qui tot viris,
tot equis sufficient. Id autem & minore im-
pendio fit, quam si in singula capita iniquis
illis exactoribus solvendum esset, & com-
modius multo, cum cibi exquisiti appo-

K 3 nantur,

nantur , & ad arbitrium cujusque parati ; unde etiam in exteris nationibus, qui laute & splendide vivunt, suo coquo & supelle-
ctili utuntur, immo & lectos etiam ferunt. Et nos saepius experti sumus , quam grave sit viles semesasque dapes , & crambe re-
coctum pransitare , quod apponunt per-
diti caupones. Qui ut apud Comicum Co-
quus loquitur,

Plant.
Pſend.
Act. 3.
ſc. 2.

— *Condita prata in patinis proferunt.*

Boves qui convivas faciunt, herbasque oggerunt;
Eas herbas herbis aliis porro condunt.

Teritur ſinapi ſcelerata cum illis.

Quam item fædum ac spurcum lecti for-
des pati, saepius puris & scabiei, & luis ve-
nereæ signa maculasque præferentis? Cer-
te , cum Seneca , *siccum panem, & ſine mensa*
prandium, post quod non ſint lavanda manus, &
lectum qui refitat corpori, nullumque ejus præbeat
vestigium , mallem ; quam his spurciis uti.
Nam præterquam in celeribus oppidis ,
quis neget ut plurimum misera hospitia
effe? Quod autem de perfoſſis parietibus
addit, falſum eſt : uti & alia quæ verbis at-
tollit.

Epiſt. 87.
& 108.

tollit. Nec tanta est molestia, quasi domus circumferenda esset, ut ille imaginabatur. Vsus ac consuetudo jam istud facile reddidit. Et apte, ac concinne, miraque celeritate omnia explicantur, atque convasantur.

Gens ad ferociam & licentiam nata,
quam vocant libertatem.

Ferociam ad Scotos jam ablegavi, agnitam ab ipso Barclaio. De libertatis apud nos modo & statu, dicam infra. Nunc vero legem, qua nos barbaros facit, à calunnia vindicabo.

Adeo (inquit, ad ferociam sunt nati) ut infandæ barbariei legem, multis seculis ibi solemnem, vix nunc deum omiserint. Ea scilicet caverant, ut, qui hominem peremisset, solveretur metu judiciorum, si in jacentis cadaver projecisset pauculos

culos nummos , quorum numerus
eadem lege destinabatur.

In hac iniqua criminatione , nostri quid
prius accusem nescio. Certe ei & fides ; &
peritia, & judicium deest ; & temeraria tan-
tum malignitas supereft . Falsum enim ,
quod metu judiciorum solutos homicidas ,
& tantum projici dicit pecuniam in cada-
ver occisi. Nam etsi multa pecuniaria est ,
decisione tamen judicum constituitur , &
(quod ex imperitia auctor omisit) additur
semper , in pænam , gravis & opacus carcer ,
in imo & fundo turris , anno integro & ses-
qui-mense tolerandus , de quo pacisci , &
transfigere , nunquam fas est : Et convicti
transactionis factæ , iterum illum subire te-
nentur. Neque hæc legum benignitas cui-
vis patrocinatur homicidio. In recenti , ut
loquuntur , facto , & crimine , capti , tum in-
vasores , prædones , capitale subeunt sup-
plicium. Qui vero glande è sclopeto oc-
ciderit , dupli mulcta pecuniaria , & bien-
nali carcere punitur. Quid hic vero imma-
polio ne ?

ne? quid infandum? quid barbarum? Atqui audi, ô imperite, & disce, non æquitati naturali, non juri divino contrariam hanc legem; multis vero gentibus usitatam; & denique, rectæ rationi valde congruam consonamque esse. Singula hæc ut ostendam, & comprobem: Fateor quidem deberi poenam omni sceleri, natura id dictante & exigente: sed non certæ ultionis, aut vindictæ, verum societatis, ad quam homo natus est, conservandæ causa. Nam appetitus ille reponendi doloris, quem solum vindicta respicit, non est naturæ rationali, quam solam hic spectamus, proprius, sed ei, quam cum brutis habemus communem.

Vnde finis verus poenæ, ex sententia Theologorum, *aut est* (dicam hoc verbis Senecæ illis consentientis) *ut eum quem punit emendet*; *aut ut poena ejus cæteros meliores reddat*; *aut, ut sublatis malis, securiores cæteri vivant*. *Emendatio nempe ejus qui peccavit*. *Exemplum ne peccent alii. Securitas* denique ne mali noceant bonis. Ad hos vero fines consequendos, non semper poena requiritur capitalis.

L Quin-

S. Thom. 2.

2. Q. 107.

Ar. 1.

De Clem.

Lib. 1.

cap. 22.

Quin-imo & ad emendationem illa est optimā , quæ postquam castigavit , poenitentiæ & correctioni locum relinquit : Et ad exemplum magis conduit, si longa, si diuturna est : & securitati denique sufficere potest, etiam citra mortem irrogata, si gravis sit & severa, si non conniveat, non ignoscat , & ita demum infligatur , ut potestatem adimat nocendi. Quæ omnia in lege nostra palam est contineri. Ergo hinc apparet illam juri naturæ minime adversari. Sed divino forsan adversatur , quod aperte mortem irrogari jubet homicidæ. Exod.

Cap. 20. v. 12 , & 15. Levit. Cap. 24. v. 17.

*S.Thom. i.
2. Q. 104.
Art. 3.* Verum in promptu est opponere , quod omnium Theologorum consensus , & Ecclesiæ approbavit auctoritas. Leges nempe Hebræis datas, alias morales fuisse, quæ præcepto Decalogi potissimum continentur , & quibus omnes tenentur Christiani. Alias ceremoniales, quibus non modo non tenentur, sed etiam prohibentur uti. Alias denique politicas, & judiciales, easque nec imperatas , neque prohibitas nobis. Inter istas

istas postremas ponitur hæc de homicidiis , à qua ut non discedendum temere concedam ; ita hoc audacter affirmo , per illam non esse vetitum supremæ civili potestati , mitiora fanciendi , pro ingenio & natura populorum. Si enim licita ei est , citra peccatum , clementia & remissio poenæ , quod nemo diffitetur : cur non moderationis & temperamentum ? Non enim profecto ea necessitas est supplicii , quæ restitutionis. Nam restitutio , quia compensat injuriam , non potest parte invita à judice condonari. Poena vero , dum nihil accusatori confert , præter feram vindictæ dulcedinem , ideo & veniæ capax est , & multo magis moderationis ; quam lex Euangeliū minime certe prohibet. Immo cum repositionem injuriæ , & ultionem adeo arcte restringat , certe multo magis talionem improbare videtur. Quam & in foro Iudaico tum demum exercitam , cum lædens pacisci nollet , Rabini testantur , *& dentem pro dente, oculum pro oculo* repeti , fas esse dicunt ; sed ea cum exceptione , si aliter satisfactio

L 2 non

non sequatur, quam & arbitrio Iudicis putant decernendam. In legibus vero Decemviralibus, recenset Lipsius, caput quadragesimum tertium verbis istis *SI MEMBRVM RVPSIT. NI CVM EO PACIT. TALIO ESTO.*

Lib. 4. Sed pœna hæc duodecem tabularum (inquit Iustinianus) in desuetudinem abiit; quam autem Praetores introduxerunt, in judiciis frequentatur. Nempe Honoraria, (ut vocabatur) & secundum dignitatem læsi, vitæque ejus honestatem, pecuniaria mulcta æstimata. Quod si talio ista ad terrorem tantum data est Hebræis, nec unquam in usu forensi habita; si Romanis etiam nimis rigida visa est; quanto magis decet Christianos, illa, quantum fieri potest, abstinere? qui legem gratiæ habemus, omnis patientiæ ac mansuetudinis Magistrum. Vnde quidam Capitalia supplicia vetita omnino nobis esse docent, falso quidem, sed tamen non barbarie infanda, ut nos accusat Barclaius; quin potius affectata lenitate, & pro ingenio hæresis studio contranitendi. Tertium posui, multis gentibus legem ejusmodi fuisse usitatam.

tam. Quod certe ostendere perquam facile est. Nam *vetustissimi mortalium* (inquit Tacitus) *nulla adhuc mala libidine, sine probro, scelerere, eoque sine pœna & coercionibus agebant.* Postea vero corruptis moribus, pœnis & severitate legum opus quidem fuit, sed illas *verisimile est* (inquit Diodoti concione Thucydides) *mitiores etiam contra maxima scelera, initio fuisse; donec, cum propter lenitatem contemnerentur, tandem ad mortem plerique processerunt.* Vnde & Plinius, dum inventores rerum longo ordine recenset, *Primum judicium Capitalis in Areopago actum esse*, dixit. Et ante Draconis severas sanguinariasque leges, puto Græcos, ut plurimum capitali supplicio abstinuisse. Certe Romani valde abstinevere, ut leges illæ sacratæ, tum vero Porcia Semproniæque testantur: quibus prohibitum cuicunque Magistratui, civem verberare, multo minus securi ferire, *tantumque exilium permisum in damnatos.* Quod Cicero in Oratione pro domo sua, *jus proprium dicit liberæ civitatis.* Reges quoque Ægyptios (auctor est Diodorus Siculus) damnasse

*Lib. 3.
Annal.*

Lib. 3.

*Lib. 7.
cap. 56.*

*Sallust.
Catil.*

L 3 mortis

mortis reos , ad metalla aut aliud opus , sa-
 lutari instituto. Et nunc in Italia, alibique,
 ad triremes passim condementur . Sed
 quod ad rem meam maxime facit, inter de-
 creta Sancti Stephani Hungariae Regis, ca-
 put 16 de homicidiis recensetur , quod to-
 tum adscribam. *Si quis accensus ira, (inquit)*
ac superbia elatus , spontaneum commiserit homici-
dium ; sciat , se , secundum senatus nostri decretum ,
centum & decem daturum auri pensas , ex quibus
quinquaginta parentibus dentur , decem autem ar-
bitris & mediatoribus condonentur : ipse quidem
homicida secundum institutionem Canonum jeju-
net . Quæ lex etsi multo lenior est nostra ,
non intra mulctam tantum consistit : ta-
mén excusari potest eo, quod profecto

Tαργύειον ἐστιν αἷμα καὶ ψυχὴ θεῖος

Pecunia, anima & sanguis est mortalibus :

Et , si hæc sufficiat ad cohibenda facinora,
 haud opus asperioribus remedii erit. Ecce
 vero , tot gentium consensus absolvit nos
 hoc barbaræ legis probro , quod hybrida
 Barclaius nobis imposuit : ostenditque ,

Lib. 2.

ut cum Lactantio dicam , olim nefas visum ,
 quam-

Habentur
ad finem
Histor.
Vngarie
Bonfinii.

quamvis malos, tamen homines, suppicio capitibus afficere. Quod certe & rectæ rationi congruum consonumque est. Nam seu severitas necessaria est, magis illa exercetur, ac ostenditur, viventium cruciatu: Mors enim Sallust. Catil. *ærumnarum requies, cuncta mortalium mala dis-*
solvit. Et, ut Seneca ait, impunitatis genus est, Seneca de Clem. *jam non habere pœna locum: Denique necem* urgenti, responderi, cum altero Seneca, id est Tragico, potest.

De fine pœna loqueris, ego pœnam volo. Thieste
Seu bonum communitatis spectas; Nemo Lib. ult. *dubitat (inquit Quintilianus) quin si nocentes* mo. Instit. *mutari in bonam mentem aliquo modo possint; sic-*
ut posse interdum conceditur, salvos eos esse magis è
Republica sit, quam puniri. Seu ad fines alios
pœnæ respicis, jam dictum est, ad illos non
requiri extrema supplicia. Et denique, si
naturam humanam expendis, tot affectibus
obnoxiam, & eorum impulsu, ac impetu,
labi & abripi facilem: necessario suadebis
mitiora, & adhibendam moderationem dices, Seneca de Clem.
qua sanabilia ingenia distinguere à deploratis sciatis.
Sed cum Barclaius infcitiam ostendisset
suam,

suam , improbando legem non certe barbaram , sed humanam potius ac benignam , tum subjungit maligne causam ejus , ac dicit.

Nec tam vile (inquit) fecissent humanae vitæ pretium , nisi , sui ingenii impetu, pro levi facinore haberent , humanum cruxorem prodigere.

Solon interrogatus , cur in parricidam nullum assignasset supplicium , respondit , se noluisse poenam sceleri ponere , quod nun
Pro Roscio. quam sperasset patrandum . Sapienterque illum fecisse , Cicero ait , cum de eo nihil sanxerit , quod antea commissum non erat , ne non tam prohibere , quam admonere videretur . Et cum Spartanus quidam interrogaretur , quare Spartæ in adulteros nulla lex esset , nulla poena . Nullus , inquit , apud nos adulter est . Vides igitur certissimum argumentum innocentiae esse , legum paucitatem , & addo lenitatem : Bonosque mores poenis non egere , & corruptissima Republ. non plurimas solum , sed atro-

atrocissimas etiam leges : Cum nempe flagrans
flagitiis animus , non levioribus remedius restinguen-
dus est , quam libidinibus ardescit . Sed frustra ;
nam vitio ingenii humani certum est , ea
sæpius committi , quæ maxime vindicantur .
Itaque in Italia , quamvis adeo non homi-
cidia tantum , sed arma etiam , id est , instru-
menta necis vetentur , nullibi tamen fre-
quentiores homicidæ , nullibi sæviora la-
trocinia , nullibi crebræ magis , & ex insi-
diis structæ cædes . Gallia etiam , scimus ,
quam in cassum prohibet suetas sibi mo-
nomachias : Et cum Parisiis essem , in tutum
nemini noctu pedem domo efferre , ita
omnes plateæ infestæ prædonibus , non
modo spoliantibus , sed trucidantibus et-
iam erant . Imputat igitur nobis , propria
aliis nationibus crima Barclaius , quorum
liberabo Poloniæ , vel hac unica , fida cer-
te , & recentis memoriæ , narratione . Annis
abhinc quindecem Varsaviam prope solen-
nis electio Regis nostri , nunc feliciter im-
perantis , peragebatur . Ingens omnino mo-
le & gravitate negotiorum , majestate con-

M sessus,

sessus , numero civium , splendore vario , ac pompa gentis , legatorum denique nos undique adeuntium veneratione . Quæ omnia , si apud exteros eo apparatu gesta fuissent , nescio quæ non habuissent elogia : ut est mos illorum , *qui de magnis majora loquuntur.* Peragebatur , inquam , ista Electio , ad quam præcipui è Nobilitate , stipati more gentis frequentissimo comitatu , tota Polonia convenerant ; ita ut numerus ducenta millia hominum facile superaret . In tam numeroso autem populi confluxu , nulli quamvis custodes essent , nulli vigiles ; urbs ipsa Varsavia nusquam clausa , & quocunque tempore noctis iis pervia , qui circum circa castrorum more stativa habuere : adeo tamen secura & tranquilla erant omnia , ut vix quisquam vi peremptus , quin ne spoliatus quidem diceretur ; idque toto feso qui mense , quo comitia illa durarunt : pacisque istius , ac quietis publicæ , unicum præsidium fuit , judicia huic fini instituta . Quæ res profecto , recte æstimanti , non minus approbat insontem Poloniam , scelerisque

que puram ; quam arbor illa pomifera, meditatione castrorum complexa , & intactis fructibus relicta , commendare solet Romani militis disciplinam. Audiamus vero ultra nos celebrantem Barclium.

Ipsum nomen (inquit) non tantum servitutis , sed & justi ac legitimi regni oderunt.

Verum est , nos odisse servitutem ; Et quidni? pestem illam naturæ humanæ, ejusque corruptæ præcipuam labem , supremam fortunæ adversæ calamitatem , pœnam suppliciumque extremum mortalis vitæ , & miseriarum denique omnium malorumque fecundam genitricem ? odimus pejus angue , & abominamur hoc generis humani opprobrium ; amamus vero , & , ut par est, æstimamus, illam, illam non dicam auream , sed quæ omne pretium longe superat'; quæ animi præcipua dos , & beatæ vitæ compendium est , libertatem. Felices nos hac forte ! beatam Patriam hoc Dei

M 2 mu-

munere , & tanto beatiorem , quo rarum
magis aliis populis decus istud , ignotum-
que bonum.

*Nam quæ revisas limina dulcissimæ
Mavortiarum maxima gentium
Regina LIBERTAS Polono
Orbe magis Litavisque campis ?
O Providentis filia consili !
O faustitatis mater & otii
Beata nutrix , ô Polona
Primus honor columenque gentis ,
Quæsita multo sanguine gloria ,
Reperta multo ! ——————*

Vt pulcherrime cecinit incomparabilis va-
tes Sarbievius nostras. Vivimus nempe se-
curi : violentiæ omnis metusque expertes.
Non miles spoliat, non publicanus atterit,
non opprimit , non cogit ad onera Prin-
ceps. Delectus , tributa , lex majestatis
unicum , ut ille ait , *crimen eorum* , qui criminis
vacant. Tum delatores , genus hominum ,
publico exitio repertum , severa supplicia ,
carcer , proscriptio , exilium , & denique in-
dicta causa mors . omnia ista ignota sunt
nobis ,

nobis , pariter & invisa. Accedimus ad Rempubl. cum lubet. Non adacti munera subimus, non ponimus sine causa jussi. Tuttum est , privatum agere. vacat periculo , gerere Magistratum , *non opes, nobilitas, omissi gestique honores pro crimine, non sinistra erga eminentes interpretatio* , nullum ex magna fama periculum, nullum ob virtutes exitium. Ita beati agimus vitam , cui nihil addi potest ad cumulum fortunæ , nisi perpetuitas. Tali vero sorte præditi , non tamen justum ac legitimum (quod impudenter Barclaius dicit) odimus Regnum. Nunquam fere eo caruit Polonia : quæ (dicam Cromeri nostri verbis) *Vnius principatum semper, præter duo exigua tempora amplexa est, bonis plerumque & moderatis, & à tyrannide alienis usa Principibus.* Hanc antiquissimam nempe , naturæ & rationi maxime congruam, usus commodique maximi , formam regiminis pridem adoptavimus , & constanter hucusque retinemus. Habemus inquam Regem , non tamen hæreditas illius, non patrimonium, sed imperium sumus. *Sedem ille Principis occupat, ne sit*

*Lib. I. De
Repub. Po-
lona.*

*Plinius
Paneg.*

M 3 Domi-

Domino locus. Ex legibus habet imperium, non in leges ; civibusque se datum arbitratur , non sibi cives. Pulcherrima vero ista & præstantissima Reipubl. forma est , & quæ sola maxime potest esse diurna. Ef- fatum enim Aristotelis de conservatione

Monarchiarum est , τῷ τὰς μὴ βασιλεῖας ἀγενῇ τὸ μετειώτερον. Ut regna nempe ad mensuram eertam , ἐ temperamentum reducantur. Vnde Theopompus , cum Spartæ Ephoros insti- tuit , quantum detraxisse potestati Regiæ , tantum ejus diuturnitati adjecisse , dicitur ab eodem Aristotele. Et nonne merito ? certe summa illa potestas , quæ Dei imagi- nem in terris præfert , firma & stabilis esse nequit , si munus suum officiumque non adimplet. Id vero tum demum optime præ- stabit , si ad Deum prototypon suum quam proxime accesserit. Porro , Deus ideo cun-cta juste regit ac gubernat , quia bonitatis sanctitatisque suæ præscripto , quasi lege aliqua adstrictus tenetur. Lex enim , ut ita dicam , ei immutabilis voluntas est , recti & æqui exactissima regula , quam transgre- di nul-

*Lib. 5. Po-
lit. cap. II.*

di nullo modo potest. Humana vero natura, cum corrupta & ad malum præceps sit, non jam à propria voluntate legem hanc petere debet, sed alterius, cuius nempe interest illam non aberrare, judicio scriptam fancitamque, & suo assensu receptam, servare tenetur. Ideoque leges potestatis velut custodes natæ, quarum standum est præscriptio. Quemadmodum autem Divinæ Majestati ac potestati nihil detrahit *ἀδύτην τὴν ἀμαρτίαν*: Immo quia delinquere non potentiae est, sed infirmitatis, addit etiam, multumque naturam commendat; Ita & Regum non minuitur potestas legibus, quæ peccare tantum vetant, sed potius firmiter stabiliturque. Vnde qui illas defungunt, aperte vim Regni *peccandi licentia metiuntur*. Ideoque in odio fint necesse est, & præsidium à vi, & terrore tyrannidi parare coguntur. *Ego vero (cum Sallustio) cuncta ejusmodi imperia, magis acerba, quam diuturna arbitror, neque quenquam à multis metuendum esse, quin ad eum ex multis formido recidat.* Sed ut pateat non nomine tantum & appellatione nobis

peccandi
nulla fa-
cultas.

*Velleius
Paterc.*

*Lib. 4.
Polit. c. 4.*

nobis Reges esse, & aliis Europæ Regibus potestate æquari , paucis illam edisseram. Scitum autem est illud, triplicia jura (nam Aristotelis partitio maxime perplacet) potestatis civilis & imperii esse. Primo consultationem de rebus quibuscunque & negotiis ; deinde judicia sine provocatione ; postremo , jus legendorum magistratum. Ad hæc tria,tota regiminis ratio,& Reipublicæ administratio , commode potest revocari. Nam jus primum consultationis , seu ad pacis tempus pertinet ; condendo leges , promulgando edicta , cudendo monetam,publica opera procurando : seu belli suscipiendi , gerendi , finiendique negotium sustinet ; & tum utitur potestate delectus faciendi, sciscendi tributi, foederum ineundorum. Ius alterum judicandi , aut publica peragit , majestatis , perduellionis, peculatus crima; aut privatas decidit, juris & facti, causas. Tertium denique,potestatem creandorum Magistratum,largendorum honorum , beneficiorumque continet. Reges itaque Poloniæ , prima duo jura ,

jura, conjunctim cum Senatu & Equestri ordine, habent. Tertium soli, sine participie aut socio, obtinent. Comitiorum nempe auctoritate, consultatio omnis peragitur ; ita tamen , ut quicquid sanctum sit , nomine Regis promulgetur, & absque ejus assensu concludi nihil possit. & ipse supremus fit belli dux, atque Imperator. Iudiciorum partem sibi ipse retinuit , partem Tribunal concessit , non absimili Gallico Parlamento. At honores & beneficia cuncta , sacri profanique ordinis , largitur ipse ex arbitrio. Ingens vero hoc, & Principum præcipuum munus , tanto vero in Poloniæ regno amplius , ac splendidius , quo beneficiandi occasio , materiesque major est. Plurima sunt etenim, qua honoris & dignitatis, qua commodi maximi, beneficia ; ita ut præfecturæ , quas Starostias vocamus , multæ, provinciarum ad instar, sint, totusque earum proventus, possessoribus obtingat, sed ad vitæ tempus tantum concessus, ut , demortuo præfecto , redeat sub arbitrium Regis , continuamque largiendi , ac

N bene-

benefaciendi , occasionem præbeat. Hinc autem apparet , Reges nostros æqualem plerisque Regibus Europæis potestatem obtinere , alios vero etiam superare. Nam Germaniæ Rex , qui vulgo Imperator audit, tum Hungariæ, Bohemiæ, Daniæ, Sueciæ , Angliæ , bellum indicere , tributum fancire , leges ferre ac promulgare , absque comitiis nequeunt : nisi forte violato jure, & temeratis patriæ institutis. Et hac parte pares sunt Regibus nostris : tam ampla autem, nec circumscripta benefaciendi potestate , etiam multo inferiores. Duo tamen sunt regna , quæ nunc παυβασιλέιαν præferunt (nam minutos illos tyranniones, quales Italia habet , δημοσόγες sciens omitto) Gallicum inquam, Hispanicumque. Cæterum , dum utriusque primam constitutio- nem expendo , invenio , in primis regnum Galliæ temperatum fuisse , auctoritate eorum , quos Pares vulgo vocant. Horum enim *tanta fuit olim auctoritas* (inquit Vincen- tius Lupanus) *ut de rebus omnibus ad Rempubl. pertinentibus, ad eos referret Rex ; penesque eos esset*
rerum

Regnum
summae
potesta-
tis.
populivo-
ros.

Lib. I.

rerum summa , & aequalis prope cum Rege dignitas. Idem secundo libro. Nostrates, inquit, de magnis, gravibus , & ad Rem publicam pertinentibus rebus , consultaturi , celeberrimum trium ordinum conventum, olim habebant : Nobilitatis , Sacerdotii, Plebis. Fuitque tempus , quo omnia ad illum referrentur; nempe, si de pace ineunda, bello inferendo , regni procuratione alicui mandanda , & vectigali exigendo, ageretur, quod, Philippo Valesio regnante , communi trium ordinum consensu sanctum est. Claudius quoque Sefellius dicit, triplici freno , summam Regum Galliæ potestatem, coerceri ; Religionis nempe, Iurisdictionis , & Politiæ : idque deducit, & explicat. Hispaniæ vero Imperium ex multis nuper coaluit regnis , & provinciis, quæ suas leges , ad cohibendam dominationem, habuere; &, nisi illis spoliata essent, certe Principatus potius, quam adeo solitæ legibus Monarchiæ, formam effecissent. Vis nempe, & oppressio , & quidquid stritæ tuetur ensis , in causa est tam ex legis dominationis. Alioqui Asiatica tantum, regna ista fuere , olim & nunc, indefinitæ,

*exlex do-
minatio.*

*Tacitus
Hist. 4.*

*Tac. 12.
Annal.*

& nullis legibus circumscriptæ, potestatis Europæis vero populis, ἀνομοτεσπονδια, invisa semper, & ægre tolerata. Servirent itaque Syria Asiaque, & suetus Regibus Oriens: (dicebat olim, apud Tacitum, magnanimus ille, & vere Civilis.) at nos servitium pati non possumus, possumus vero Principatum, & Reges, qui non dominationem, & servos, sed rectorem, & cives cogitarent. Et nonne merito hanc imperii formam elegimus? Certe, si eadem apud alios obtineret, ista temere bellandi libido, ista concessa populorum latrocinia, istud, ut Seneca dicit, occisorum gentium grande scelus, cessaret facile; neque sub onere, & jugo, tot calamitatum, gernerent miserrimi populi, si absque assensu eorum bella non susciperentur, & immensæ cupiditati ambitionique Principum, aliquem obicem, leges ponere possent. Vti quidem, apud nos ponunt, salutari prorsus instituto. Non tamen ideo, ut tu Barclai, more tuo, seu ignarus erras, seu prudens fallis,

Rex

Rex ad patrias leges , vi & armis ad-
igitur.

Quinimmo gratulor Patriæ meæ , tales
Principes hactenus ei contigisse , qui non
se supra leges esse , sed leges supra se rati ,
nihilque detrahi hinc majestati suæ merito
reputantes , vi & armis ad observationem
illarum nusquam fuerunt adigendi. Gratul-
lorque iterum toto isto tempore , quo Po-
lonia Regni nomine censetur , nisi semel
temeritate paucorum mota in Principem
arma, sed tumultuario impetu potius, quam
justo bello; quod intra exiguum tempus, si-
ne clade mutua , sine offendis, placide con-
quievit , nullo relicto mali fomite ac scin-
tilla. Non sumus ergo Monarchomachi,
quos pater Barclaii prolixo,nimiumque de
fortuna Regum sollicito, scripto oppugna-
vit. Immo quam simus φιλεστατεοι ostendit
cujusdam regis nostri dictum , gloriantis ,
velut propria & non vulgari aliis laude , se
infidiarum metu omni solutum posse in
gremio subditorum tutum securumque

Regum
amantes.

N 3 som-

*Tac. I.
Hist.*

*Plinius
Paneg.*

somnum capere. Et profecto benevolentiae erga Principes publicæ, non alibi invenias majora certioraque argumenta. Quid majus, quam cum nobis, non, *ut ceteris gentibus, quæ regnantur, certa dominorum domus* fit, nec intra illam querere Reges, nec tanquam necessario hærede contentos esse oporteat: Cum, inquam, *imperaturum omnibus, eligere possimus ex omnibus*; tanta tamen veneratio & amor erga sanguinem regium hactenus semper fuit, ut illum suffragiis & electione præterire pene nefas putaremus. Immo etiam intra claustrum Monastici septa inquisivimus stirpem regiam; & cum deesset proles mascula, non alia lege Valefio, & post Battorio sceptrum detulimus, quam ut in consortium ejus ultimam Jagellonidem assumeret. Et denique illa potissimum ratio maiores nostros impulit ad cooptationem domus Suedicæ, nunc felicititer nobis imperantis, quod nempe materno sanguine Jagellonica esset. Ut vero omittam, quæ plurima adferre possem, Principibus exhibita testimonia gratæ & aman-

tis

tis Patriæ: certe rarum est & illustre istud,
quod nuper post excessum Sigismundi III
præcipua Nobilitas toto interregni tem-
pore , lugubri & pulla veste usâ fit. Ita ut
dum isto habitu, tot millium confessum, in
Comitiis Electionis , vidissent gentium ex-
terarum legati , stupuerint ad tantum vel
venerationis , vel amoris erga Reges indi-
cium in populo præsertim libero , & nul-
lius hæreditati subiecto. Et ne finem fa-
ciam proni hujus erga Principes affectus
ac inclinationis nostræ, facit tuum, Rex se-
renissime , (nam te hoc loco merito allo-
quar) tuum, inquam, imperium ; quo huic
& futuro seculo , ut tranquilli , benigni ,
moderatique regiminis præbetur exem-
plum , ita à nobis prompti obsequii & pu-
blicæ in te benevolentiaæ rarum statuitur
documentum. Non perdis, inquam , ô be-
nigne Princeps, operam, dum ita cum civi-
bus tuis,tanquam parens cum liberis vivis.
Refertur tibi gratia , & quo te antequam
imperares amore omnes sunt prosequuti ,
eodem in imperio prosequuntur ; **Quem**
tamen

tamen per singula signa, & argumenta, non opus est recensere : Cum & tibi constet omnium memoria, & nos jactare velut magna non deceat, cum longe majora merearis. Satis est, quod isto tuo, nostroque exemplo, potissimum comprobetur, à nullis magis Principem amari, quam qui maxime dominum gravantur.

*Plinius Paneg.
Plutar. in septem Sap.
Conviv.
Tyran-
num se-
nem.
Seneca de Clem.*

Et cum vere Thales dixerit, inter rarissima quæ videntur, esse Τύραννον γέγοντα : Ita nihil frequentius, quam amorem civium, erga bonos benignosque Principes: neque mirum, eos etiam ultra privatas necessitudines amari, quia in illis, nostram vitam, nostram incolumentem amamus. Unde cum illi nos tributis & exactioribus, & mille injuriis non opprimant; nos illis non infidiamur, non seditiones molimur, non rebelliones concitamus: quorum exempla, si unquam, certe his temporibus, omnibus fere Regnis, adeo crebra ac funesta sunt, ut pudor sit, & unicum dedecus seculi nostri, nominisque Christiani maximum opprobrium. Certe & Gallia vixdum requievit, à continuis factionibus tumultuantium

aut belligerantium Principum. Hispaniæ imperium ardet ubique civilibus armis ; & vel maxime tua , ô Barclai , Britan- nia Symplegadum more colliditur , cum tot furias facesque belli intestini nuper accendit : tamque longo , tam cruento dissi- dio evertit imperium , & Regem omni ju- re ac potestate spoliavit. Maxime autem populares tui Scoti , qui Principem se ultro illis permittentem , scelere turpissimo ac perfidia , post longam licitationem , vendi- dere Anglis , postquam multis injuriis & contumeliis prius captivum affecerunt. Quamvis istud profecto non sine magna vindicis justitiæ admiratione. Ut qui dela- tum populi arbitrio Ecclesiæ dominium , tam avide arripuerunt , illi ab eodem exuti omni potestate , in-posterum precario re- ges sint , aut ne sint quidem , frustra Casau- bono Schisma Anglicanum defendantे , dum in argumentum divinæ voluntatis , fa- ctum velut approbantis , dicit (in Epistola multifariam falsa ad Frontonem Ducæum Soc. Iesv:) . Nam *στοιχεῖ* (inquit) mutatio-

Non sine
Deo.

O nem

nem hanc Anglicanam esse factam, longa pax secuta, quies publica, inaudita felicitas, primo Reginæ Elisabethæ, deinde Regis Iacobi, videntur probare. Malacia nempe & Halcedonia brevis ista fuit, his temporibus datura, quas videmus, tempestates. Cum caput Ecclesiæ male constitutum; alii adigunt ad assensum impiorum dogmatum, quæ suo arbitrio condidere: alii nullum regimen, & infinitam volunt, credendi quod velis, licentiam. Vtraque vero ratione, quam male tranquillitati ejus regni consultum erit, tempus ostendet. Sed ad cœptam Apologiam redeo.

Nobilitas (subdit) tristibus prærogativis se ipsa donavit, quibus possit sibi invicem, & impune nocere.

Cum multitudo coalescere in unius populi corpus, nulla re quam legibus possit: Cum ne latrones quidem sine justitia sociari posse, merito dixerit Cicero. Barclaii tamen tanta amētia & stupor est, ut populum gentemque fine

fine jure dicat vivere. Nam, dum impunitatem scelerum , & nocendi licentiam nobis imponit , quid aliud nos , nisi ~~adīx̄s~~ facit ? Tanta vero vel inficitia, vel malignitas seipsum satis prodit , & refelli non indiget. Cum præsertim , quæ argumento huic vicina de nobis dixi, satis superque falsi condemnent repetitam hanc calumniam. Addit vero :

Quippe Principi non satis juris est, ut,
quod peccaverint, ipse vindicet.

Ex sententia Lycurgi dixit alibi Cicero.
Præmio & pæna Rempublicam contineri. Om-
 nino vere. Nisi quod virtutis studium, com-
 modi specie excitare satius putem , quam
 metu extorquere. Nam & facilis æstima-
 tio est , quanto potiora sint , sponte suscep-
 pta, quam terrore expressa officia ; Et ma-
 nifestum , quod præmia bene agere stimu-
 lent; poenæ vero jubeant tantum, non pec-
 care. Non satis autem , non delinquere, si
 & bene mereri non studeas. Ideoque insti-

*Epiſt. ad
Brutum.*

*Plinius
Paneg.*

Idem.

*Seneca de
Clem.*

*Seneca de
Clem.*

tuto patriæ , Principibus nostris , permisum magis *beneficiis* , quam *remediis* , experiri ingenia nostra ; quia sufficere ad innocentiam , virtutemque putavimus , si profit bonos esse , cum etiam sit satis abundeque , si non noceat . Accendunt itaque potius voluntates nostras , quam adigunt . Beneficentia , illicium incitamentumque præbent virtutis ; præmia ipsi largiuntur , poenas vero ad leges & magistratus transmittunt : Et denique ea potissimum parte ostendunt potentiam suam , qua proxime ad Deum accedunt , cui prodesse , non voluntatis tantum est , sed naturæ . Hoc est utile , hoc civile imperium . Nam & *Regibus certior est ex mansuetudine securitas* : Et subditi tutiores sunt , constricto non nihil cohitoque imperantium ferro . *Principum enim saevitia , bellum est* , inquit Seneca . Et scimus quantas illa saepe strages ci-vium ediderit , quid lex illa Majestatis , tam severe , tam acerbe exercita , intulerit Reipubl . Romanæ : quam levi , quam indigna , quam iniqua causa , illustrium virorum supplicia memorentur . Scimus vero etiam , quam

quam crebra sint apud exterios : Vbi eminentiorum papaverum capita decutiuntur semper , ubi non unus Aratus , Silanus aut Séjanus vel neci deditur , vel carceri includitur. Nec inquirendum ,

— quo cecidit sub criminis ? quisnam
Delator ? quibus indiciis ? quo teste probavit ?
Nil horum. Verbosa & grandis epistola venit
A Capreis. —

*Iuvenal.
sat. 10.*

Terrent nos profecto hæc exempla , & ab illis merito cavemus. Solenni illa legis nostræ regula , *Neminem captivandi nisi jure victum*. Etsi vero temperamentum istud severitati nimiæ ponit obicem , nihil tamen officit justitiæ , neque detraxit quidquam auctoritati Principum ; quibus potissimum judicium de capite civium committitur ; quod cum Senatu quidem peragunt , sed decernere tamen solent , magis expendendo , quam numerando sententias. Quod certe ostendit , satis esse juris Principibus ad vindicanda scelera , contra quam Barclaius sueta imperitia dixit.

Maxime sibi (inquit) credunt.

Hic quid oppugnem nescio , nec quo sensu ista dicantur agnosco. *Mihi ego video, mihi ego sapio, mihi ego credo plurimum;* ait apud Comicum oculatus testis. Oculis enim suis quisque credit maxime. Et alioqui pauci sunt profecto , qui suo diffidant judicio. Certe non tu ex iis Barclai , cuius confidentia vel hoc scripto apparet, cum imperite, audacter tamen *ἀλαζονικῶς καὶ θερσέως* dixisti multa. Cæterum , si nobis potissimum credimus , id est , popularibus , conterraneis , & notis hominibus , hoc sensu certe extra culpam sumus. Nam externis quidem & ignotis plus credere, stultitia esset. *Cicero ad Att. Epist. 18. lib. 1. Vigila, & memento artus sunt isti me- tium.* Et vafer ille Siculus insurrit, *Epicharmus Cantilenam illam suam νῦφε, καὶ μέμναστο ἀπιστῶν, αἴθρα ταῦτα τῶν Φεγυῶν.* Ergo Scotis diffidimus, ut pote lucelli avidis captatoribus, meritoque putamus fidem etiam in quæstu iis esse. Sed non immoror, & propero, ut vindicem Patriam ab infami calumnia , quam per impudentiam maximam inussit Barclaius.

Nec

Plaut.
Pseud.

Superbe
& arro-
ganter.

Nec minor (inquit) libido est libertatis in moribus , vitaque incivili , quam in religionum , & cælestium rerum sensu ; de quibus, ut placet, & sentire volunt, & loqui : scilicet immanni fiducia sui , quibus sapere alieno ductu pudet. Hinc in diversa hodie scissæ mentes , errorumque omnium labes, quicunque antiqua secula polluerunt.

Qui hactenus nulla laude dignatus est Poloniam , immo omni complevit vituperio, gentemque nostram fecit ,

— *Monstrum nulla virtute redemptum*

Iuvenal.

A vitiis —

Quid miri , si reliqua pari affectu subjungit ? Hoc nempe deerat contumeliæ , ut quibus paulo ante justitiam eripuit , eos nunc religione spoliaret. Verum ut falsitatem ejus omnem hactenus revici , ita & hanc refellere in promptu est. Omnia namque

que potius eripi patiar Poloniæ , præterquam veram ac germanam pietatem. Immo firmiter & fidenter assevero , inter omnes Europæ populos , quos hærefoes afflavit contagio , nullam esse præ nostra gentem , quæ Catholicæ religioni constantius adhæserit , nullam quæ cultus Divini , pietasque publicæ , antiquam & à majoribus acceptam rationem , majori studio & ardore , hucusque profiteatur. Denique nullam , quæ majori prudentia , moderatione , innocentia , in hac seculi præsentis hæresibus infecti calamitate versata sit ; & quæ in religione turbata , immotam pacem ; in dif sensu animorum , consensum civium ; inter inquieta novis rebus ingenia , publicam tranquillitatem conservavit : Eo quidem successu , quem nunc , Regno maxima parte avitæ fidei restituto , læti contuemur. Sed ut id ostendam , (nam profecto mere tur res tanta uberius referri) in primis nullam apud nos hæresim natam dico. Peregre venit hoc malum , & incunabula ei pri mum Germania dedit ; deinde illa vere nu-

tricula

tricula non solum, ut olim Poëta dixit, *Causidicorum*, sed hæreticorum etiam *Gallia*. Ab exteris nempe, à quibus semper aliquid monstri hausimus, hoc venenum. Cui temporibus illis majores nostri præsentissimum remedium opposuere: occluso nempe omni aditu novis doctrinis, & poena constituta in eos, qui illas discerent, adferrarent, seminarent. Nam in primis, Vladislao Jagellone, anno M C D X X I V , cum nempe in Bohemia nova dogmata pullularent, acribus poenis hæresis prohibita, confiscatione bonorum, imminutione capitis, & quod sequitur, in captos & pertinaces, capitali supplicio: *Vt nempe (legis expressa verba) quos censura Ecclesie non terneret, humana severitate multarentur.* Paulo post eadem edicta repetita, & sub Sigismundo primo, anno M D X L I V , peregrinatio quidem, quæ ante huic fini vetabatur, concessa; sed poenis & judicio subjacere jussus, si quis rediens (verba item legis) qualescumque novas doctrinas aut libros subministraret, & uti illis vellet. Sigismundi Augusti temporibus, cum jam

P vicina

vicina nobis Germania arsisset hoc incen-
dio , non mirum est , proximum parietem
correptum fuisse eadem flamma , quam re-
stinguere non erat tum virium nostrarum.
Serpit malum per totum Reipubl. corpus,
legumque auxilio cohiberi non potuit. Ita-
que post mortem Augusti , interregni tem-
pore, in Conventu publico, cauta dissiden-
tibus securitas. Et Rex Henricus Valesius,
eumque secuti Reges omnes juravere , *pacem* & *tranquillitatem inter dissidentes de Religione*
tueri , nec ullo modo quempiam pœnis , in causa
religionis , afficere. Moderatione nempe ista
utendum erat, ne remedia exasperarent ma-
lum , cui tollendo impares eramus. Sed ta-
men jura Ecclesiæ illæsa mansere ; honor-
que sacerdotii, à majoribus nostris ad pro-
curationem Reipubl. admissi, nihilo est im-
minutus. Neque quicquam decepsit Reli-
gioni Catholicæ , quæ ab ipso initio Chri-
stiani apud nos nominis , tot legibus fun-
data , & velut jam materfamilias facta , à
nova hac , & nuper adventitia hospite, nul-
lo modo potuit premi , nedum veteri pos-
sessione

sessione exturbari. Tolerantia nempe hac consultum tantum est , ut inter cives pax & quies esset ; non turbæ , non seditiones, non mutuæ cædes , non internecina bella , quæ totam Europam hucusque exercent , & misere conficiunt . Cum autem cessarent publica ista odii irritamenta , facile rediit animus, concordiæ cupidus, & dissidiorum religionis pertæsus : puduitque , cum quibus Patria, sanguine, amicitia, moribus, lege, imperio, conjunctus sis, disjungi opinione , de Deo & Divinis , & se mutuo , velut impios aversari. Hinc temperato sectæ studio , semoto , qui præcipitare solet ingenia , affectu , expensum quæ cauſæ Schismatis ? quis ille animus , quæ mens primam fidem erroris accusans ac condemnans ? unde potestas ista separati cætus , & novæ Ecclesiæ instituendæ ? quid in pertinaci hoc diffensu , non præceps, non malignum, non virulentum ? Tum deinde quæfiere multi, quænam illa fuisset religio, qua primum majores nostri in Christianismo instituti ? Postquam vero hanc fuisse, quæ

P 2 nunc

nunc à novitiis istis impugnatur , historiæ ,
legum, actorum publicorum,totiusque an-
tiquitatis testimonio , agnatum comper-
tumque est ; tum detecta novitas, & facile
spreta ; plurimique resipuere, & derelictam
repetiere veritatem. Restituta igitur tem-
pla , cultusque in illis Divinus , Catholica
pietas aucta , & hæresis maxima parte ab-
dicata. Spes porro manet non vana , redi-
turam & reliquis mentem , & *unam fidem*,
unum baptisma , indivisamque Ecclesiam fo-
re , modo persistat Polonia in fraterna ista
quiete ac concordia. Et certe nuper Rex
noster , ad tollendum religionis dissidium ,
celeberrimum conventum Torunii indixe-
rat ; id decere existimans felicitatem tem-
porum,qua, illo imperante,Polonia fruitur;
ut quemadmodum domitis hostibus , pax
est patriæ restituta , ita quoque mentium
animorumque esset , uno ore , una lege, ac
præscripto, Deum venerantium. Quamvis
vero votis optimi Principis, & expectatio-
ni multorum eventus non responderit ;
tamen cum ego , nobilitatis nostræ pacata
inge-

ingenia , dum exoletam prope hæresim ,
dum studia quiete & mora multum tem-
perata expendo , negotium hoc successu-
rum nequeo desperare ; si ab illo , quantum
potest , arcerentur illi , quibus vel fovere ex-
pedit , vel certe non est integrum , schisma
relinquere . Tales autem sunt Ministri , &
Civitatum delegati : dum illi commodi ,
existimationis , sacerdotiique retinendi ; hi
vero mutationis , & turbarum metu , tueri
ac defendere malunt qualemcunque modo
jam communem & receptam fidei ratio-
nem . Optandum igitur esset , iterum hoc
negotium redire ac repeti ; semotis quan-
tum fieri potest istis , auctoritate Principis ;
sedulaque magis cura , cum primoribus
Nobilitatis transigendum . Neque profe-
cto causam video , cur amoveri non de-
beant , aut Ministri , adeo studio litigandi
infecti , penes quos nulla est potestas de-
cernendi , quomodo intelligendæ sint scri-
pturæ ; aut Civitates , quas , & difficile est
ad consensum revocare , & indignum , tan-
quam æqualis cum nobilibus juris , ad

unum conventum vocari. Sed hæc Deo permittenda. Nunc vero, ut isto intervallo ad Barclaium redeam, facile, ex his quæ dixi, apparet, quam inique nos impietatis accuset, & irreligionis; quantoque verius ista, quæ nobis imponit, de aliis Europæ populis, & vel maxime de Britannia, id est, Anglia & Scotia dicerentur. Scotia, in-tenebrae. quam, ubi vere mentium *oxonia* est, & spissa impuritas. caligo, ubi *ανθρωπία* catarorum, & purissima illa impuritas regnat: ubi vix ullum vestigium Christianæ pietatis, & profanta ac eversa religio omnis vetus: nova vero in diversa, ut dicit Barclaius, *scissas mentes* ad publicam discordiam agit præcipites, &

*Horat. lib.**x. Ode 35.*

*Ad arma cessantes, ad arma
Concitat, imperiumque frangit.*

Sed pauca, quæ adhuc restant, pari affectu de nobis à Barclaio dicta, expendamus.

Quisque (inquit) in suæ familiæ laudem intentus est, præsertim si in externos incidit, & expertes suarum fortunarum. Certe

Certe propriam familiam ornare omni laude , nec contentum esse relicta à majoribus gloria, id demum est generosum esse. Neque puto tam amens fuit Barclaius , ut hoc in vitio poneret. Potius ostentationem in nobis accusat & damnat : *Quod si quid subinane, Εγ̄ non ἀφιλέθδοξον*; si, inquam, aliqua jaētantia est , profecto non de nihilo est ; neque similis illi Scotorum , se passim regia stirpe ortos dicentium ; tam vere utique , quam Pallas , aut nescio quis ille Claudii libertus , regibus Arcadiæ oriundus erat. Et cum nemo eorum dignum quidpiam ea , quam fingit fortuna , præferat; omniumque rerum inops, & sæpe mendicus sit ; *majore cachinno excipitur vulgi*, quam ille inopinatus Stoicorum Rex irridetur à Plutarcho : qui cum magnifice dixisset **Ἐγὼ μόνος ἐμὶ βασιλεὺς*; mox, egestate fortis suæ admonitus , philosophaster misellus chlamydem poscit , & integumentum , dicitque †*γαρριγῷ ή βαμβαλίζω*. Sed, hac occasione , lubet pauca de familiarum laude at texere. Et primo Nobilitatis nostræ de-

*Cicer ad Att. lib. 2.
Epist. 17.
inappetens glo-
riæ.*

Iuvenal.

*In libello
contra Stoic-
os magis
inopinato
quam Poë-
tas divites.*

* *Ego so-
lus Rex
sum.*

† *Nam ex
frigore
contre-
misco.*

cora

cora & ornamenta, deinde opes, postremo splendorem referre. Quæ et si mira forsan exteris videbuntur, non opus tamen judico, anxia veritatis pollicitatione fidem stipulari: Cum in re inquire & nosci tam facili, & in hac luce temporis, nullus possit esse mendacio locus; cuius usu cum natura ac consuetudine mea prohibeor, tum Patriæ etiam causa: Non minus enim illa falsa prædicatione, quam aperto vituperio læderetur.

Natalium itaque honor apud nos eximus est, & plerisque gentibus antecellit, plures ob causas. Prima est, quia avita nobilitas, & ab ipsa gentis nostræ origine cæpta, sola successione continuatur. Nullum jus adoptionis habemus; Nobilitatis prærogativa ægre plebeiis hominibus confertur; & externæ, illustres quamvis familiæ, difficulter admodum ad jura gentis admittuntur: consensu nempe unanimi omnium ordinum, qui nisi magnis meritis obtinetur. Suetonius dicit, Augustum *magni existimasse, sincerum atque ab omni colluvione peregrini*

regrini ac servilis sanguinis , incorruptum servare populum , ideoque civitatem Romanam parcissime dedisse . Sequitur plane hac parte maximi Principis judicium Patria nostra ; ideoque veterem conservat nobilitatem , supra aliorum populorum morem , ubi solo arbitrio Regum , homines vilissima saepe origine , & terrae filii , ad nobilitatis decus extolluntur : ubi (ut Satyricus dixit) una Quiritem ^{Persius} _{sat. 5.} vertigo facit , & prout complacuit hero

— Momento turbinis exit

Marcus Dama. —

Vbi denique exteri consulo accersuntur , ad supremas dignitates evehuntur , ut graves nempe sint patritiae Nobilitati . Apud nos vero (dicam Plinii verbis) Nobilitas non obscuratur , sed illustratur à Principe ; & magnorum virorum Nepotes ac posteros , nec terret ipse , nec pavet , quin immo honoribus amplificat , atque auget , & in usum Reipublicæ promit . Altera causa est , quod nothos & spurios nec ad familiæ nomen , nec ad hereditatis sortem admittamus . Aliter quam apud exterros , ubi fere extra probrum est , taliter nasci . Et rege

Q

præ-

*Plinii
Paneg.*

præsertim , quamvis extra matrimonii legem, sati, adeo non velant hoc dedecus, ut etiam jactent , præferuntque insignia parentum,levi signo addito,id est, linea trans-

Horat. lib. Epod. 4. versim ducta : At *Fortuna non mutat genus.*

Et quantumvis amplæ opes ac dignitas , emaculare certe nequit hanc turpem notam. Vnde nos merito abhorremus,& abominamur flagitia ista tori : adeo quidem , ut si quis concubinam duxerit, prolemque post initum matrimonium susceperit , non spuria illa quidem , sed ignobilis tamen censetur ; & hereditatem adire nullo modo potest. Hac ratione consulitur honori intaminato familiarum , quæ vetustissimæ sunt nobis , & omni laude ac dignitate splendidæ. Tertia causa possit assignari , quod titulorum nominumque discrimina illa, quæ antiquis ignota , nunc apud exteros paßim obtinent , non habemus , & nupera lege usurpare prohibemur. Non Dukes , inquam, Marchiones, Comites, Barones , & ejusmodi cognominum quisquilias, fatiscente imperio Romano , id est , ipsa tempo-

temporum barbarie ortas: Quæ si ultro ab externis Principibus delata quidam acceptavere , aut non sprevere potius , non tamen ordinem in Republ. faciunt separatum , nec ultra equestrem honorem , ultra claritudinem generis ac splendorem majorum quidquam eis aut juris , aut dignitatis accedit. Dignitas enim omnis à Magistratibus , muneribus , officiisque publicis manat ; & inter vere nobiles , honor natalium per se indistinctus est ; magno ubique æqualitatis libertatisque præsidio. Certe & apud Romanos jus imaginum , & patritiorum honor , non aliunde quam à Magistratibus fuit: Consulatu nempe , Censura , Prætura , Ædilitate. Isque ad posteros sola successione derivabatur , & non amitti , non adimi poterat. Quid hoc vero , inquies , veræ generis claritudini aut vetustati officit? officit certe plurimum : Titulis enim istis , quibus apud exterorū honor familiarum constat. non personæ , sed possessiones & patrimonia , stultissima prorsus ratione , insigniuntur. Ita ut Illustri quamvis sanguine , ac

ne , ac stirpe creti, nisi hæredes sint & successores bonorum , amittant titulos parentum, qui ad emptores vili sæpe origine homines, una cum patrimoniiis transeunt. Et ita honor olim virtuti datus , & illi soli debitus , cedit pecuniæ quocunque quæstu comparatæ. Illa & genus & splendorem confert, & efficit, ut solo censu tota nobilitas constet. Ideoque merito suspecta est; & non æquiparanda nobis , qui inempto & gentilitio honore gaudemus. Apud Romanos olim quam aliter! Certe si imagines in atriis collocatæ , id est , *expressi cera vultus majorum , cum affixis hostium spoliis, & rerum gestarum titulis monumentisque* una cum domo ad emptorem transirent, non tamen in gloriam aut decus emptoris cedebant : quinimo erat hæc (inquit Plinius) *stimulatio ingens, exprobrantibus tectis , quotidie imbellem dominum intrare in alienum triumphum.* Hæc ratio debet quoque apud exterros obtinere , ne aut clarissimorum virorum posteritas , parto à parentibus splendore excideret , aut novi homines in eorum decora & insignia

*Plinius
Lib. 35.*

Ibidem.

titulo-

titulorum irreperent. Cæterum antequam hoc de nobilitate finio , leve quamvis , dicendum est tamen (nam id saepe exteri mirantur) quare nempe omnes videamur esse cognomines , communi illa in sibi nominum terminatione. Obiter igitur causam accipe : quia nempe patronymica & possessiva apud nos ita fere desinunt. Vnde exempli causa Hispanicus nobis est Hiszpanski, Polonicus Polski, sic Tenczynius, (quod nomen celeberrimæ apud nos fuit familiæ) Tenczynski, &c.

Opulentiam familiarum dum referam , nominibus earum abstinebo. Nam singulas recensere longum nimis operosumque effet : paucas excerpere , invidiae ac offendæ obnoxium. Hoc vere in universum affirmo, non esse præ nostra gentem, quæ proprius ad magnitudinem illam opum Romanarum accedit , æmuletur , & in multis æquet. Possessiones & latifundia agrorum, non dicam,cum Persio, privatis hominibus tanta esse , *quantum non milvus oberret* ; sed quæ multorum sui juris & potestatis in

Europa principum ditiones longe multumque superent. Magna illa sunt, & vere admiranda, quæ Lipsius, testimonio veterum, de privatis Romanorum opibus dixit. Et præcipue dum Senecam adducit, Romanorum avaritiam insectantem ac dicen-

Epiſt. 89. tem : *Ager uni domino, qui populum cepit, angustus est? Quousque arationes vestras porrigetis, ne provinciarum quidem satione contenti, circumscribere prædiorum modum? Illustrium fluminum per privatum decursus, & amnes magni magnarumque gentium termini, usque ad ostium à fonte, vestri sunt. Hoc quoque parum est, nisi latifundiis vestris maria cinxistis; nisi trans Hadrianum, & Ionium, & Ægeum vester villicus regnat: Nisi insulae, ducum domicilia magnorum, inter vilissima rerum numerentur. Magna, inquam, ista, & tanti imperii amplitudine digna, illique soli propria. Polonia non tam late regnat, ideoque nec mirum, si etiam privati angustius possideant. Attamen multorum avita patrimonia tam ampla sunt, ut si sparsæ per varias regni partes possessiones jungerentur, facile provincias viginti, immo & triginta*

triginta milliariorum (quæ nobis ejusdem sunt cum Germania mensuræ,) efficerent. Novi multos, qui centum, ducentos, trecentos, & amplius pagos, oppida viginti, immo & triginta possident. Sunt non pauci, qui, è ditionibus propriis, mille pedites, equites item mille levis armaturæ, quos Kosakos & dragones vocamus; immo sunt, qui tria, quatuor millia possunt educere: Inter quos partitus est ager, ut modico addito stipendio ad omnem nutum heri militent. Quo ipso certe ad eam mensuram divitiarum valde accedimus, quam Crassus definivit; qui (ut Plinius dicit) *negabat locu-* Lib. 33.
cap. 10.
pletēm esse, nisi qui reditu annuo tueri legionem pos-
set. Reditus vero ipsi ex tam amplis possessionibus maximi sunt, sed non tam pecunia æstimandi (quanquam & ista abunde suppetit) quam copia & affluentia omnis annonæ, omniumque rerum. Immensa quippe illa est, & si eo pretio væniret, ea que parsimonia absumeretur, qua apud exterros, certe facile illos, qui antonomastice olim divites vocabantur, quos Plinius recenset

censet lib. 33. cap. 10. facile, inquam, æquarremus. Paucis quædam libabo. Messes, quas nos sexagenis manipulis solemus computare, tam abundantes, tamque optimæ sunt, ut filiginis & tritici ex autumnali satu, multi decem, non pauci viginti milia, immo quidam & multo amplius sexagenarum (liceat mihi sic substantive efferre,) demetant. Tantundem vero ex vernalatione hordei, avenæ, & omnis generis frugum. Sexagena vero triturata duos fere medimnos exhibet; quibus si pensio frumenti, quam coloni annuatim multis in locis magno numero pendunt, addatur, facile inde proventus ingens poterit æstimari. Quid dicam de aliis commodis, quæ res rustica & agricultio suppeditat? quid de variis pecoris numero ac emolumento? Cum in majori Polonia, ubi res pecuaria viget maxime, triginta ovium millia quidam suis in prædiis hyemaverit? In Russia vero, quot armenta boum? Moris est, septennio quovis redeunte, decumam partem à subditis omnis jumenti ac pecoris exigere.

exigere. Et compertum habeo , quendam decem millia boum exdecimasse. Sed cum nimis longa hæc expectatio proventus videretur , illum ita divisisse bona , ut in singulos annos plus mille acciperet. Plures autem sunt, qui, si eadem ratio placeret, non quidem tanto numero , sed tamen quotannis quingentos , sexcentos , & amplius habere possent. Piscinas non prætereo, è quibus uberrimus quoque petitur proventus. Earum rationem veteribus ignotam descripsit eleganter & accurate Ianus Dubravius Olomunicensis Episcopus. Quanquam non tanta, ut ipse dixit, cura aut impendio res egeat, præsertim in Russia. Non enim ibi *in seminaria attritus & genitura causa pisces imponuntur , non tenelli fœtus inde petuntur , non piscinae in tres classes divisæ ,* prout ista omnia exacte prorsus requirit Dubravius. Sed rivi suapte piscofi aggere retinentur , donec ad certam mensuram spatiisque sæpe maximum , & ad integrum aliquando milliare Germanicum stagnaverint. Ita vero per triennium aquæ detentæ, per emissaria

R

ficcan-

siccantur, ingentique piscium numero possessores beant. Qui etsi vili pretio venduntur, tamen saepe decem, quindecem, immo usque ad triginta millia florenorum una e piscina reditus adferunt. Mellis preventum jam antea retuli, quem solum agnovit Barclaius. Commoda item, quae petuntur e sylvis, & alia, quibus non lubet immorari. Finio itaque hanc strictam de opulentia nostra narrationem. Et vere testor, me consulto ubique minora vero dixisse. Nam credi sibi volenti, non modo falsa semper vitanda sunt, sed etiam saepe nimis mira reticenda; Quia

Tarda solet magnis rebus inesse fides.

Ovidius
Epist. 16.

Eadem cautela utar, dum narrabo splendorem, aut luxum potius, gentis nostræ. In quo utinam non tam vera essent, non tam magna, tamque modum egressa omnem, quam haec sunt, quæ referam. Certe mallem, ut veram laudem continentiae potius & frugalitatis, quam vanam hanc pompæ ac profusionis quæreret & mereatur patria nostra. Attamen ut purgem illam

illam mendacii notam , quam imponit Bar-
claius , ostendamque non falsa à nobis nar-
rari *exteris & expertibus nostrarum fortunarum*,
sed potius , quia nos suis opibus moribus-
que metiuntur , ægre forsan illis creden-
da ; Dico in primis , familiam nos alere su-
pra omnium gentium consuetudinem nu-
merosam , splendidam , per varia genera ,
officia , ministeria distinctam . Modus &
ratio ejus apud Magnates est fere iste . Au-
licos habent , seu honoratores quosdam fa-
mulos , genere nobiles , ætate maturos ,
moribus graves , rerum peritia aut milita-
ribus studiis insignes . Horum quilibet fe-
re ad rhedam eleganter ornatam , sex equos
concolores impensis Domini alit ; equum
præterea , more gentis , phaleratum ; tum
necessæ est tres quatuorve habeat mini-
stros ; & præterea , dum se jugibus vehitur ,
aurigas binos , atque agasones . Aulici isti
in itinere lecticam domini cum rhedis
suis , in urbe vero equitando , præcedunt
egregia pompa , & semper anteambulones
& deductores sunt . Mundities vero illis

exacta & sumptuosa. vestis ferica in promiscuo usu , immo frequens etiam auro texta. Arma argento culta , & phaleræ, & omnia denique eleganti ac splendido ornatu conspicua. Salaria ampla habent , præter id , quod in victum & sustentationem eorum cum ministris & equis impeditur. alii quingentos taleros annuos accipiunt, alii usque ad mille; quidam ultra annuam pensionem prædia singula , immo sæpe aliquot villas tenent , gratuito sibi concessas. Numerus talium sæpe ad viginti accedit, continuo aulæ adhærentium. Nam qui per intervalla , & jussi tantum a vocati famulantur , illi certe quinquagenerium numerum excedunt , omnesque certis & constitutis pensionibus pacti sunt & obstricti. Aliud genus famulitii est , quos stipatores vocare liceat , nos vocamus , Komornikos ; Lecta nempe juventus, quæ binis aut ternis aliquando equis meret: omnes item genere nobiles , & ab aulicis ætate tantum dispare , alioqui munditie atque cultu non multum dissimiles. Vigin-
ti, tri-

ti , triginta aliquando & ultra habentur. His accedunt adolescentes, qui à cubiculo sunt , & qui penitiora circa herum obeunt officia. Et hæc nobilium est manus. Sequitur alia turba famularis. Musici in primis magno numero variique generis. Scio qui in solos symphoniacos Italos annuatim impendebat quinque , sex millia talerorum , præter mensam , quam illis præbebat. Iam vero structores mensæ , promoscondos , coquos , & plurimos item officiales aulæ , qui tot laboribus sufficient , longum esset referre singillatim. Potius custodum integras centurias , per nationes distinctas recensebo. Commune igitur laute ac splendide vitam agentibus centum , ut vocant , Dragones , Germanicæ ut plurimum gentis ; Kosakos centum , è Vologchia fere accitos ; centum denique pedites , quos Hoidukos vocamus , Hungaros natione , continuo alere , & hanc ordinariam manum semper præsentem habere , vel securitatis , vel ornamenti causa. Quoties vero domo prodeunt , nempe ad co-

mitia, aut ad alias publicas functiones, tri-
plo, immo quadruplo, majori utuntur co-
mitatu. Vnde facile est facere conjectu-
ram, quantis impensis tam frequens & tam
numeroſa aula egeat, quantum in stipen-
dia, quantum in victum & amictum tot
hominum erogandum fit; quantum deni-
que constet sustentatio & pabulum equo-
rum, qui magno prorsus numero, & ſæpe
ducenti, trecenti, & ultra aluntur. Ad
alium splendorem gentis si transirem, si
sumptus varios, ac immensos memora-
rem; si aſotos illos nostros recenserem, fa-
cile appareret, non aliam gentem eſſe, ma-
gis proclivem *ad cuncta, quis pecunia prodigi-
tur*: Magnificos enim apparatus convivio-
rum, exquita cænarum ingenia, cibos
aliarum nationum, & quidquid opiparum,
quidquid erudit luxus ab illis inventum
est, paſſim & laute usurpamus, *appositas* (ut
dixit ille) *dapes, non tam sapore, quam sumptu-
aſtimantes*. Condimentis certe ciborum or-
be novo petitis, tanta copia utimur, ut
Hollandorum, qui ſoli iſta vendunt, testi-
monio

Tac. 3.
Annal.

*Lat. Par.
in Paneg.*

monio sciam , plus eorum absumi in Polonia una , quam in reliqua Europa omni . Vestium vero sumptus quantus sit , testis Italia , quæ ingenti cumulo sericum nobis suppeditat . Et negotiationem hanc apud nos præcipue exercet , alioqui (ut antea dixi) cessatura ab opere , cui soli maxime incumbit . Auro certe ac gemmis , purpura ac bysso nitent ac splendent omnia ; & aliarum gentium lautitia adeo longe à nobis est , ut parsimonia mera , sed ostentatione inani artificiose tecta videatur . Verum sufficient ista , non in laudem certe , sed in assertionem splendoris , quem narratum exteris imminuere , fidemque ejus abrogare videtur Barclaius . Ultima vero ejus , quæ supereft pravi in nos affectus aut judicij nota , jam sequitur ista :

Sævire (inquit) quam decipere promptiores ; & ipsi magis fraudibus , quam vi patent .

Iterumne sævitiam objicit & improperat ?

rat? Iterum hoc probro Patria vindicanda? Non certe: Nam & satis hac de re dictum est, & non lubet cum Balatrone isto *ταυτογένων*. Agnosco vero & amplector nos non esse deceptores: Libenter aliis sagacibus & astutis populis hanc palmam concedimus; & fatemur, illos in omni vita versutiori ingenio esse, quam sit (ut cum Plauto dicam) rota figularis. Non tamen fraudibus eorum patemus, & prudentia munimur, quæ merito *in vizio ponit* & *omnibus credere est nulli*. Nisi forte à Scotis saepius nos falsa & adulterina merce deceptos didicit Barclaius. Tales certe homines, & in re vili

Plant.
Pseud.

Qui cavet ne decipiatur, vix cavet, cum etiam cavet.

Alioqui non illa nobis simplicitas est, quæ incautos omnibus efficiat. Scimus fraudulenta ingenia dignoscere, possumusque non modo vitare eorum artes, sed etiam *Vulpinari*. cum illis *ἀλοπεχίᾳ*. Cum autem à vi nos tutos esse dicit, cur non fortitudinem nobis

bis propriam commendat uberius? Meretur profecto hanc laudem armis invicta gens, & nullius unquam exteri subjecta imperio, nullius subacta potentia, & de qua olim Poëta cecinit:

Maxima pars hominum, nec te pulcherrima Ovid. de
Ponto,
Eleg. 3.
curat

Roma, nec Ausonii militis arma timet.

Latus lætusque esset campus, evagari per historiarum amoena spatia, & exinde argumenta petere fortitudinis nostræ. Facile esset fusos fugatosque parva manu hostium exercitus, castra capta, expugnatas urbes memorare; & comprobare, nos vere obicem ac vallum esse, vel (ut proprio elogio utar, quo nos honestavit Pontifex, post Chotinense cum Turcis bellum) *Antemurale orbis Christiani*. Facile, inquam, hæc omnia narrarem, nisi satis es-
sent hæc, quæ hactenus dicta sunt. Cum etiam pæne pigeat, tantum operæ in exiguam hanc scripti laciniam impendisse.
Vnica est excusatio, quod, etsi levi occa-
S fione

sione provocatus , non levia tamen , neque
haetenus exteris nota , de origine , situ ,
indole , moribusque gentis & patriæ no-
stræ dixi .

F I N I S.



